Tèyåte walon

Ci côp chal... c'èst po l'bon

Comèdèye è treûs akes D'Emile Mathot

Ci côp chal... c'èst po l'bon

Personèdjes

Melîye LEGRAND	Feume da Mathieu	47 ans
Colète	Si fèye, feume da Roger	25 ans
Ortense	Feume da Victôr	40ans
Mathieu LEGRAND		50 ans
Victôr MARNEFE		40 ans
Roger PÎRE		30 ans
Houbert MINET	Docteûr	35 ans

PRUMÎR AKE

Qwand l'teûle si lîve, li scin.ne riprésinte ine fwért bèle plèce : tave, tchèyîres, onk ou deûs fauteûy, ine radiyo, ine T.V., on tèlèfone. So onk des meûbes, on platê avou des bwètes dissus, c'est les médes d'à Mèlîye.

Ine pwète à l'hintche main qui done è colidor èt deus autès pwètes à l'dreute : eune qui done è l'couhène; ine aute qui done so l'montêye qui mon.ne dizeur. Et Mèlîye est tote seule so l'scin.ne èt èlle è-st-assiowe èn-on fauteuy.

SCIN.NE 1 : Mèlîye - Matieû

MELIYE - Matieû ?

(on n'rèspond nin)

MELIYE (pus fwért) - MATIEU!

LI VWES D'A MATIEU D'VINS LES COULISSES - Vo-m-chal.

(èt Matieû inteûre tot r'souwant ses mains avou s'vantrin)

MATIEU - Qu'i-n-a-t-i ?

MELIYE - I v's a falou l'timps.

MATIEU - Dji n'vis aveû nin oyou.

MELIYE - Poqwè, qui fîz-ve ?

MATIEU - Dji disbaléve les comissions qu'dj'a stu fé èt dj'èlzè mètéve è l'ârmå èt è frigo.

MELIYE - Vos n'avez rin roûvî, dè mons ?

MATIEU - Nèni, don, m'fèye, pusqui v'm'avîz fait fé l'lisse di tot çou qu'dji d'véve atch'ter.

MELIYE - Et poqwè r'souwez-ve vos mains ?

MATIEU - Là qu'èle odît l'pèhon... (il ode ses mains)... Et dj'èlzè va laver là qu'èle flaîrèt co.

MELIYE - Li pèhon n'flaîre nin.

MATIEU - Qwand l'est cût, nèni, mins qwand l'est crou.

MELIYE - E-st-i bê ?

MATIEU - Qwè ?

MELIYE - Li pèhon sûr'mint.

MATIEU - Sûr çoula qu'il est bê, vos sèpez bin qu'Marèye nos wade todi l' pus bê bokèt.

MELIYE - Adon vos l'pôrez fé po dîner, mins nos n'dîn'rans qui qwand vosse bon camarade, li docteur Minèt, arè v'nou.

MATIEU - Dè pèhon po on sèm'di, mins nos 'nn'avans co magnî îr !

MELIYE - Vo sèpez bin qu'c'est çou qu'dj'inme li mîs.

MATIEU - Bon, c'est come vos volez. Et k'mint l'volez-ve vosse pèhon, cût è

l'pêle avou dè boûre ou bin cût è l'êwe ?

MELIYE - E l'pêle.

· MATIEU - Et qui vôrîz-ve bin avou ? 💯

MELIYE - Ine crompîre ou deûs, nin pus', vos sèpez bin qu'dji n'magne wêre dispôy qui dj'se malade.

MATIEU - Ét come lègume ?

MELIYE - Vos n'arez qu'à fé 'ne pitite salade, mins avou dè citron, èdon, nin avou dè l'mayonaîse, çoula n'mi vat rin.

MATIEU - Nin mèzahe di m'èl dire, dj'èl sé dispôy sî meûs.

MELIYE - Asteûre, mi volez-ve bin d'ner m'catchèt èt m'aler qwèri on vêre d'ê\e, c'est l'eûre.

MATIEU (<u>i</u> va prinde on catchèt d'vins 'ne bwète qu'est so l'platê èt èl done à Mèlîye) - Tènèz, dji v'va qwèri on vêre d'êwe.

MELIYE (là qu'Matieû droûve li pwète dè l'couhène) - Loukîz bin qu'èle ni seûye nin trop freûde, savez.

MATIEU - N'ayîz' nole sogne, dj'aveû mètou on pot 1'tave a matin come tos les djoûs po qu'èle seûye on pô tène.

(coula dit, i r'mousse è l'couhène èt i r'vint avou on vêre d'êwe qu'i done à Mèlîye)

MATIEU - Tènèz, m'fèye.

MELIYE - Mèrci, Matieû... (èle prind s'catchèt avou on côp d'êwe èt rind l'vêre à Matieû qu'èl mète so l'tâve)... Dji v'done des mas d'tièsse, èdon, mi-ome?

MATIEU - Ci n'est rin,m'fèye, dji so là po çoula.

MELIYE - Dj'èl sé bin, m'fi, c'è-st-à mi qu'dj'ènnè vou d'n'aveûr nole pacyince pôr qwand dj'ratind l'docteûr. Mins qui faît-i co, parèt, ci-là?

MATIEU - Ci n'est nin co si-eûre, èdon, Mèlîye, vos sèpez bin qu'i vint tofér so l'fin dè l'matinêye.

MELIYE - Dji n'sé qu'ine sôre, c'est qu'magré qu'il est vosse camarade èt qu'vos djouwîz tofér à l'belote avou lu divant qu'dji n'toumasse malade, c'est todi mi qui passe après l's autes.

MATIEU - C'est qu'i-n-a mutwèt des pus malades qui vos èt qu'èlzè deût vèyî d'vant dè v'ni chal.

MELIYE - Des pus malades qui mi !

MATIEU - Sûr'mint.

MELIYE - Èt bin qui v'fât-i, vos, dji so chal è m'fauteûy quasî tote li djoûrnêye èt dj'n'a minme pus l'fwèce dè monter d'zeûr tote seûle.

MATIEU - Djans, don, Mèlîye, li docteûr vis l'a d'djà dit pus d'ine fèy, c'est des îdèyes qui vos v'boutez-st-è l'tièsse.

MELIYE - Des îdèyes !

MATIEU - Ci n'est nin mi qu'èl dis, c'est lu.

MELIYE - Et vos t'nez-st-avou lu, vos, èt por vos come por lu, dji n'so nin malade, c'est des îdèyes!

MATIEU - Qui volez-ve qui dj'dèye, dji n'so nin docteûr, mi.

MELIYE - Nèni mins por vos ossu, si dji d'meûre è m'fauteûy, c'est po m' plaîsîr èt si dji v'fais fé les comissions, li manèdje èt l'couhène, c'est co todi po m'plaîsîr!

MATIEU - Dji n'dis nin çoula, Mèlîye.

MELIYE - Adon qui d'hez-ve ?

MATIEU - Rin, dji n'dis pus rin, dji faîs çou qu'i-n-a-st-à fé èt tot çou qu'vos m'dimandez.

MELIYE - Awè, Matieû, vos èstez bin binamé, ossu dinez-me mi vêre d'êwe, dj'èl va beûre là qui m'catchèt m'a d'moré so li stoumak. MATIEU (i done li vêre d'êwe à Mèliye) - Tènèz, m'fèye. MELIYE (èle beût èt rind l'vêre à Matieû) - Mèrci, Matieû, èt asteûre, qu'alez-ve fé tot rawardant l'docteur ? MATIEU (i va vès l'pwète dè l'couhène) - Dji va pèler les crompîres po qui dj'n'âye pus qu'à lzè mète cûre. (à c'moumint-là, on sone) MELIYE - Tins, sèreût-ce li docteûr ? MATIEU (tot-z-alant vès l'pwète dè l'hintche) - Po l'pus sûr, dji va droviért. (i sôrtèye èt r'vint on pô après avou Colète) SCIN.NE 2 : Mèlîye - Matieû - Colète COLETE (tot rabrèssant Mèlîye) - Bondjou, mame. MELIYE - Bondjou, m'fèye. COLETE - Kimint v'va-t-i ? MELIYE - Todi parèy. COLETE - C'est çou qui m'papa m'a dit è colidôr... (èle done on paquèt à s' mame)... Mins tènèz, dj'a-st-apwèrté çouchal por vos. MELIYE - Qu'est-ce qui c'est ? COLETE - Çou qu'vos inmez bin, des praniles. MATIEU - Ni m'ènnè volez nin, m'fèye, mins so l'timps qu'vos djasez avou vosse mame, dji va pèler mes crompîres, mi. COLETE - Volez-ve qui dj'èlzè pèle, papa ? MATIEU (<u>i va vès l'pwète dè l'couhène</u>) - Nèni, m'fèye, dimorez chal. MELIYE (so l'timps qu'Matieû sôrtèye) - Vosse papa a raison, pôr qui vos n'vinez qui l'sèm'di èt èco, il arive qui vos n'dimorez wêre. COLETE - Mins, mame, c'est qu'dji n'a wêre di timps! MELIYE - Wêre di timps, wêre di timps, qwand s'mame est malade, on troûve todi l'timps. COLETE - Mins, mame, vos roûvîz qu'dj'oûveûre, qui dj'a-st-in-ome, deûs èfants qui dj'deûs-st-aprèster l'a-matin èt lzè miner è scole divant d'aler à mi-ovrèdje, èlz'aler r'qwèri å dîner, èlzè rèminer èt l'z aler r'qwèri 'ne fèy di pus' qwand dj'sôrtèye dè bureau po rintrer è l'mohone wice qu'i buvèt l'café d'vant dè fé leûs d'vwérs so l'timps qu'dji m'mète è l'couhène po-z-aprèster l'soper po Roger. MELIYE - Pace qui voste ome ni v'såreût-st-aîdî, parèt. COLETE - Roger ! MELIYE - Bin awè, Roger, loukîz vosse papa, lu, dispôy qui dj'so malåde. COLETE - Roger n'est nin m'papa, il a d'l'ovrèdje disqu'à l'copète dè l' tièsse dismètant qui m'papa vike rintî. MELIYE - Di l'ovrèdje disqu'à l'copète dè l'tièsse, in-ome qu'est d'vins les assurances èt qui s'pormon.ne avou si-auto tote li djournêye! COLETE - Ci n'est nin s'porminer, savez, qu'i fait, il oûveûre èt avou l' crîse, ènnè va todi pus timpe a matin èt i rinteûre todi pus tard po vèyî l'pus d'djins possibe. Mins n'djåsans pus d'Roger èt... MELIYE - Siya, djåsans d'lu. Poqwè n'è-st-i nin chal avou vos oûy ? COLETE - Pace qu'il a miné les èfants amon ses parints èt qu'il è-st-èvôye

MELIYE - Pace qui moncheû va djouwer à l'belote èt v'laît l'ovrèdje so les

djouwer 'ne belote avou ses camarades.

reins.

COLETE - Mins, mame, Roger n'à qui l'sèm'di po-z-aler djouwer s'belote divant dè dîner pace qui l'après-l'dîner, i deût aprèster s'toûrnêye po l'samin.ne qui sût èt l'dîmègne, i m'aîde à fé l'manèdje. Et asteûre, ni djåsans pus d'Roger si v'volez bin?

MELIYE - Oh ! fez come vos volez, dji n'mi vou nin ocuper d'vosse manèdje.

COLETE - Adon, djåsans d'vos, li docteûr qui dit-st-i?

MELIYE - Li docteûr !... On bê d'docteûr, i d'vreût d'djà èsse chal, mins nèni, i n'î est nin co èt sèpez-ve bin poqwè ?

COLETE - Poqwè ?

MELIYE - Pace qui por lu, dji n'so nin malade.

COLETE - Kimint çoula ?

MELIYE - I dit qu'c'est des îdèyes qui dji m'boute è l'tièsse. Ot'tant dire qui dji d'vins sote, djans!

COLETE - Mins nèni, èdon, mame, çou qui l'docteûr vout dire, c'est qu'après tos les èxamins qu'vos avez passé à l'ospita, des radiyos, des èxamins dè song', dè coûr, dè cèrvê èt dji n'sé tot qwè, i n'troûve nin çou qu'vos avez, ci n'est nin di s'fâte.

MELIYE - Adon i n'a qu'à m'fé passer des autes... d'èxamins.

COLETE - Mins volà pus d'sî meûs qu'vos 'nnè passez, qui volez-ve qu'i fêsse co ?

MELIYE - Dji n'è sé rin, mi, dji n'so nin docteûr, c'è-st-à lu dè qwèri èt dè trover çou qu'dj'a.

COLETE - Mins s'i n'troûve rin.

MELIYE - I-n-a qu'à trover 'ne saqwè, c'est s'mèstî. À réze, si coula n'va nin mîs, dji va candjî d'docteûr, minme si Minèt è-st-on camarade d'à vosse papa.

COLETE - Poqwè don candjî, li docteûr Minèt est riknohou po-t-èsse on fwért bon docteûr.

MELIYE - S'il est si bon qu'çoula, i n'a qu'à m'riwèri.

COLETE - Djans, mame, ni v'plaindez nin tant !

MELIYE - Vos avez bèl à dîre vos, m'fèye, mins si vos v'sintîz come dji m'sins.

COLETTE - Mins v's avez m'papa qu'est todi chal èt qui fait tot por vos.

MELIYE - I n'maqu'reût pus qu'çoula.

COLETE - Mutwèt, mins mètez-ve on pô è s'plèce.

MELIYE - Kimint è s'plèce ?

COLETE - Bin awè, i n'sét minme pus aler beûre si vêre avou ses camarades, lu qu'aveût l'abitude d'aler djouwer 'ne belote li sèm'di avou Roger, d'aler vèyî on match di foutbal èt dè beûre si p'tit vêre chal divant dè magnî, asteûre...

MELIYE - Qwè, asteûre ?

COLETE - C'est lu qui deût fé tot, minme les comissions èt l'manèdje.

MELIYE - Po sî meûs qu'èl fait, l'manèdje, dji l'a fait vingt-cinq ans, mi, èt sins beûre on vêre.

COLETE - Pace qui v'n'inmîz nin, mins m'papa, c'è-st-in-ome.

MELIYE - Çoula n'vout rin dire. À réze, il a bu assez èt i n'a pus mèzahe dè beûre, çoula n'lî vat rin.

COLETE - Awè, mins...

MELIYE - Mins qwè ?

COLETE - Vos d'vrîz r'prinde ine chèrvante.

MELIYE - Ine chèrvante !... Dj'ènn'a-st-avou treûs d'chèrvantes èt dj'ènnè vou pus.

COLETE - Vos d'vrîz co r'sayî dè r'prinde eune, mame, si ç'n'est nin minme por vos, fez-le po m'papa.

MELIYE - Poqwè po vosse papa, i n'a nin mèzahe di chèrvante, lu.

COLETE - Nèni, mins pinsez-ve qui c'è-st-ine vèye qu'il a po in-ome ?

MELIYE - Et mi, quéle vèye a-djdju chal è m'fauteûy ?

COLETE - Dji n'dis nin, mins m'papa n'est pout rin.

MELIYE - Mi nin pus, dji n'è pou rin... Et asteûre, c'est tot, èdon, m'fèye, djåsans d'aute tchwè... Volez-ve beûre ine jate di cafè ?

COLETE - Awè, mins qwand dj'l'arè bu, dj'ènn'îrè.

MELIYE - Vos f'rez çou qu'vos vôrez... Matieû !... MATIEU !

COLETE - Qui fez-ve, don?

MELIYE - Dji houke vosse papa po vosse jate di cafè...

COLETE - Mins, mame...

(à c'moumint-là, Matieû inteûre todi avou s'vantrin)

SCIN.NE 3 : Mèlîye - Colète - Matieû

MATIEU - Awè, Mèlîye.

MELIYE - Colète vôreût bin 'ne jate di cafè, mi-ome.

MATIEU - Tot dreût, m'fèye.

COLETE - Nèni, don, papa, d'morez, dj'èl va qwèri mi-minme.

MATIEU - Mins, siya, m'fèye, dji n'a tot l'minme rin d'aute à fé.

COLETE (<u>èle va drovi l'pwète dè l'couhène</u>) - Et mi dji dis qu'nèni. (<u>èt tot d'hant çoula</u>, <u>èle mousse è l'couhène</u>)

et tot d'hant çoula, ele mousse e l'coun

SCIN.NE 4 : Mèlîye - Matieû

MELIYE - Pusqui èle vout, lèyans-le fé, mi-ome. Mins å pwèrpôs, wice ènn'èstez-ve avou l'dîner?

MATIEU - Dj'a mètou les crompîres cûre à doûs feû èt dj'a d'djà fait l'salåde qui dj'a mètou è frigo po qu'èle dimeûre frisse.

MELIYE - Dji sohaîte qu'èle li seûye co qwand l'docteûr sèrè v'nou èt qu'nos pôrans magnî.

MATIEU - Mins i va-st-ariver, c'est si-eûre asteûre... (come i dit çoula, on sone djustumint)... Vos vèyez bin, c'est lu.

(èt Matieû sôrtèye po-z-aler drovi l'pwète so l'timps qu'Colète rinteûre)

SCIN.NE 5 : Mèlîye - Colète

COLETE - On-z-a soné, mame.

MELIYE - Awè, c'est sûr li docteûr Minèt. Mins vos, avez-ve bu vosse jate di cafè.

COLETE (come li docteûr Minèt inteûre avou Matieû) - Awè.

SCIN.NE 6 : Mèlîye - Colète - Matieû - Li docteûr Minèt

LI DOCTEUR (tot prindant l'main d'à Mèlîye) - Bondjou, Madame Legrand... (i va d'vès Colète)... Oh! bondjou, Madame Pîre, binahe di v'vèyî. COLETE - Bondjou, docteur.

LI DOCTEUR (à Mèlîye) - Et k'mint v'va-t-i, Madame Legrand ?

MELIYE - Todi parèy èt il est quasî timps qu'vos v'néze.

LI DOCTEUR - C'est qu'vos n'èstez nin tote seûle èt qu'dj'aveû d'autes malâdes à vèyî.

MELIYE - Vos årîz polou ataquer por mi.

LI DOCTEUR - Dji fais cou qu'dji pou èt adon, come dji v'l'a d'djà dit,

vos v'pinsez pus malade qui v'n'èstez.

MELIYE - Kimint çoula, dji m'pinse ?

LI DOCTEUR - Bin awè.

MELIYE - Come di djusse, por vos, c'est des îdèyes, come vos avez dit à mi-ome.

LI DOCTEUR - Alèz, Madame Legrand, lèyans-le å réze, dji va prinde vosse tinsion... (Mèlîye si taît èt l'docteûr prind s'tinsion)... 14, 8, mins c'est fwért bin çoula.

MELIYE - Tot côp qu'vos v'nez, vos d'hez parèy, mins dji n'va nin mîs, mi. LI DOCTEUR (i prind l'pôce d'à Mèlîye) - Eco on p'tit moumint, si vos volez bin... (Mèlîye dimeûre keû)... 72... Mins vosse coûr bate come ine ôrlodje.

MELIYE - Mi coûr n'a rin à vèyî avou çou qu'dj'a... (èle si drèsse come èle pout)... Et asteûre, aîdîz-me à monter d'zeûr po m'fé m'piqueûre, i n'a qu'lèye qui m'faît dè bin... (à Colète so l'timps qui l'docteûr li prind s'brès' po l'aîdî à roter)... À r'vèy, mi fèye, èt s'rabrèssîz Roger por mi minme s'i n'mi vint nin vèyî fwért sovint.

COLETE (èle va rabrèssî Mèlîye) - Å r'vèy, mame.

(èt Mèlîye sôrtèye avou l'docteûr po-z-aler è s'tchambe)

SCIN.NE 4 : Colète - Matieû

COLETE - I fåt qu'dj'enne vaye asteure, papa.

MATIEU - Dèdjà !

COLETE - C'est qu'dji deû fé mes comissions,

èt rintrer po fé m'dîner po qwand Roger r'vinrè.

MATIEU - Kimint va-t-i ?

COLETE - I va bin, mins qwand l'samin.ne est hoûte, i s'rafèye d'èsse è l'mohone po s'rihaper.

MATIEU - Vos n'avez mèzahe di rin?

COLETE - Nèni, papa.

MATIEU - Mins s'i v'fât 'ne saqwè, i m'èl fât dire, èdon, nin à vosse mame pace qui come èlle est.

COLETE (èle rabrèsse Matieû) - Mèrci, papa, èt asteûre, dji m'save.

MATIEU - Awè, m'fèye, èt rabrèssîz l's èfants por mi... (come Colète va d'vès l'pwète)... Colète ?

COLETE (èle si r'toûne) - Awè, papa.

MATIEU (<u>i va-st-è potche di s'pantalon</u>, sètche si porteseuye èt prind deûstreûs bilèts foû qu'i stind à Colète) - Tènèz, vos lzî atch'tèy'rez 'ne saqwè, as èfants.

COLETE - Mins, papa...

MATIEU - Prindez, v'dis-dje.

COLETE (èle prind les bilèts, les mète è s'sacoche) - Eco, mèrci. (èle rabrèsse co Matieû èt èle sôrtèye)

SCIN.NE 5 : Matieû adon l'Docteûr

Dimoré tot seû, Matieû prind on cigare sol'arma èt s'briquèt è l'tahe di s'vantrin, s'assève è fauteûy qui Mèlîye aveût qwité po monter d'zeûr èt il èsprind s'cigare tot djusse come li docteûr Minèt rinteûre avou s'trousse, come on dit)

MATIEU - C'est fait ?

LI DOCTEUR - Awè, dj'lî a faît s'piqueûre, mins Mèlîye m'a . dit di t'dîre...
MATIEU - Qwè ?

```
DOCTEUR (tot mètant s'trousse so l'tave) - Qu'èle ni d'hindreût nin po
   dîner.
 MATIEU (i sospîre) - Eco 'ne fèy !
 LI DOCTEUR - Kimint, èco 'ne fèy ?
 MATIEU - Bin dispôy treûs samin.nes, qwand ti vins, c'est parèy, èle
   dimetre è s'lét tote l'après-l'dîner, dji lî det monter s'dîner èt adon
   dji so chal tot seû èt dji n'sé qwè fé po passer m'timps, pusqui dji
   n'wêze minme pus beûre on p'tit wiski ou 'ne pitite gote tot foumant
   m'cigare.
 LI DOCTEUR - Taîs'-tu èt vas-se qwèri des vêres.
 MATIEU - Des vêres !
 LI DOCTEUR - Awè, des vêres èt mète on bokèt d'glèce divins si t'ènn'as
   è frigo.
 MATIEU - Mins poqwè ?
 LI DOCTEUR - Vas-se qwèri des vêres, dis-djdju co.
      (Matieû s'drèsse èt va-st-è l'couhène so l'timps qui l'docteûr
       droûve si "trousse" èt sètche ine botèye foû èt qu'èl mète
       so l'tave come Matieu rinteure avou deus veres
 MATIEU (i s'arèstêye, louke li botèye) - Qu'est-ce qui c'est qu'çoula ?
 LI DOCTEUR - T'èl veûs bin, dè wiski.
 MATIEU - Et c'est twè qui...
LI DOCTEUR - Awè, c'est mi qui t'va chèrvi... (i droûve li botèye, rimplihe
   les vêres)... Et volà.
MATIEU - Awè, volà 'ne bone îdèye !
LI DOCTEUR - Poqwè ?
MATIEU - Pace qui dj'enn'a mezahe.
LI DOCTEUR - Dji m'enn'a doté... (i s'assèye so 'ne tchèyîre et il
   èsprind 'ne cigarète)... A t'santé, hein, Matieû.
MATIEU - A t'santé, Hoûbêrt.
    (i buvèt on côp d'leû vêre èt Matieû s'rassèye è s'fauteûy avou s'vêre
     è s'main)
LI DOCTEUR - Et asteure, djasans.
MATIEU - Di qwè ?
LI DOCTEUR - Di twè èt di t'feume.
MATIEU - Di mi !
LI DOCTEUR - Awè.
MATIEU - Pogwè ?
LI DOCTEUR - Pace qui ti m'va dire çou qu't'as.
MATIEU - Mins dj'n'a rin.
LI DOCTEUR - Enn'est-ce bin sûr ?
MATIEU - Si t'èl vous sèpi, dj'ènn'a m'sô.
LI DOCTEUR - Coula, ti n'as nin mèzahe di m'èl dire.
MATIEU - Awè, mins cou qu'ti n'sés nin, c'est qu'por mi, viker come dji vike,
  çoula d'vint 'ne penitince et qu'si coula deure co longtimps, c'est mi
  qu'va toumer malade.
LI DOCTEUR - C'est possibe.
MATIEU - Et c'est tot çou qu'ti troûves à dire ?
LI DOCTEUR - Nèni, pace qui c'est mutwèt coula qu'i fareût.
MATIEU - Qwè ?
LI DOCTEUR - Awè, Matieû.
MATIEU - Ti d'vins sot, sûr'mint !
LI DOCTEUR - Nèni, Matieû, hoûte-mu.
```

MATIEU - Dji t'hoûte. LI DOCTEUR - Et bin volà, ti feume n'est nin malade. MATIEU - C'est çou qu'dji lî a co dit tot-rade, qui c'èsteût des îdèyes come tim'l'as d'djà dit. LI DOCTEUR - Et qu'a-t-èle dit ? MATIEU - Qui dji d'héve parèy qui twè èt qu'dji pinséve qui c'èsteût po s'plaîsîr qu'èle dimoréve tote li djoûrnêye è s'fauteûy. LI DOCTEUR - Dji n'a may dit qu'c'esteût po s'plaisîr, c'est tot bon'mint pace qui èle si boute è l'tièsse qu'èlle est malade èt ç'est çou qu'on nome ine "malade imaginaîre", come Molière l'a scrît. MATIEU - Quî est-ce ci-là, on camarade d'à tonk ? LI DOCTEUR - Nèni, on scriyeû di d'vins l'timps. MATIEU - Et si èlle est malade imaginaire, come ti dis, qui pôreûs-se LI DOCTEUR - Mi, rin, mins twè, siya. MATIEU - Mi ! LI DOCTEUR - Awè. MATIEU - Qwè ? LI DOCTEUR - El fât-st-oblidjî à n'pus d'morer è s'fauteûy, à d'veûr roter, à fé s'manèdje, li couhène èt à t'sognî. MATIEU - A m'sognî! LI DOCTEUR - A t'sogni. MATIEU - Mins dji n'a rin. LI DOCTEUR - Asteûre, mins in-accidint est vite arivé. MATIEU - In-accidint !... Qui vous-se dire ? LI DOCTEUR - Ti n'as nin sogne dè toumer ? MATIEU - Dè toumer !... Wice vous-se qui dji tome. LI DOCTEUR - Divins les montêyes, po t'diner 'n-èximpe. MATIEU - Divins les montêyes ! LI DOCTEUR - Awè, mins i n'a nin mèzahe dè toumer d'haut, hein, deûs-treûs grés, c'è-st-assez. MATIEU - Et si mågré coula, dji m'sipèye ine djambe ? LI DOCTEUR - Bin ti n'arès qu'quéquès samin.nes à d'morer è fauteûy. MATIEU - Bon... Dihans qu'dji vou bin èt qu'dji tome, après çoula, qui faîsdjudju ? LI DOCTEUR - Come i n'a qui t'feume chal, ti braîs après lèye pusqui ti n'ti sés pus r'lèver. MATIEU - Kimint pus m'rilèver ? LI DOCTEUR - C'est twè qu'lî dîrè coula. MATIEU - Poqwè ? feume à bodjî, à m'tèlèfoner po m'houkî. MATIEU - Mins si dj'n'a rin, kimint f'rès-se ? LI DOCTEUR - Dji vinrè, dji f'rè come si t'aveûs 'ne saqwè èt dji t'monrè

LI DOCTEUR - Dis don, Matieû, t'es bouché awè ou nèni !... Po-z-oblidjî t'

amon on profèsseur qu'è-st-on camarade d'à meune èt dj'lî èspliqu'rè l'afaire.

MATIEU - Et adon ?

LI DOCTEUR - Ti r'vinrès chal avou on bê plate èt c'est twè qu'arè dreût å fauteûy.

MATIEU - Et wice çoula nos monrè-t-i ?

LI DOCTEUR - Nos veurans si t'feume est malade imaginaire, awè ou nèni, mins dj'so sûr qu'èle n'a rin... Ti comprinds, èle n'a rin.

```
MATIEU - Dji t'creû, mins si dj'fais çou qu'ti m'dimandes, dji n'are pôr
  pus rin, mi !
LI DOCTEUR - Kimint coula, pôr pus rin ?
MATIEU - Bin nèni pace qui asteure, dji va co fé mes comissions, beure on
  d'mèy ou on wiski tot-z-î alant, mins si dj'so-st-oblidjî dè d'morer
  chal èt tot-z-ad'mètant, come t'èl dis, qui m'feume seuye capabe dè fé
  s'manèdje, ci n'est nin lèye qui m'donrè on vêre, sés-se.
LI DOCTEUR - Dj'èl sé bin, mins ci sèrè mi qu't'èl donrè.
MATIEU - Twè !
LI DOCTEUR - Awè, mins nin trop'.
MATIEU - Et k'mint f'rès-se ?
LI DOCTEUR - Dji t'f'rè prinde ine botèye.
MATIEU - Ine botèye po 'ne djambe cassêye !
LI DOCTEUR - Mins nèni.
MATIEU - Poqwè adon ?
LI DOCTEUR - Dihans qu'ci sère po tes niérs là qu'ti n'ti pôres pus bodjî.
MATIEU - Mins mes niérs ni sont nin malades!
LI DOCTEUR - Nèni, mins po t'feume èl sèront.
MATIEU - Et qu'i-n-arè-t-i è l'botèye ?
LI DOCTEUR - Qui vôreûs-se bin, dè cognac ou dè wiski ?
MATIEU - Dj'inme ot'tant dè wiski.
LI DOCTEUR - Adon, t'arès dè wiski.
MATIEU - Et ti pinses qui l'farmacyin m'ènnè donrè ?
LI DOCTEUR - Bin sûr qui nèni.
MATIEU - Et k'mint t'î prindrès-se ?
LI DOCTEUR - Dji f'rè fé l'minme botève por mi.
MATIEU - Et adon ?
LI DOCTEUR - Ine fèy è m'mohone, dji toudre m'botèye èt dj'mètre de wiski
  d'vins èt qwand dji t'vinrè vèyî, dji f'rè l'discandje des botèyes.
MATIEU - Ine bone idèye, louke coula, mins c'est qui...
LI DOCTEUR - C'est qui qwè ?
MATIEU - C'est qu'dji beû co voltî on vêre di bîre ossu.
LI DOCTEUR - Ni t'ènnè fais nin, ti vêre di bîre, c'est t'feume qui t'èl
  donrè.
MATIEU - Mèliye !... Ti pins'reûs co bin !
LI DOCTEUR - Siya pace qui dj'lî dîrè qu'c'est po tes reins là qu'ti dets
  d'morer è t'fautely.
MATIEU - Et poquè po mes reins ?
LI DOCTEUR - Po t'fé pihî là qu'ti n'ti r'mowes nin assez.
MATIEU - Qui vas-se, dji t'fais confyince.
LI DOCTEUR (i live si vere) - T'as raison et coula dit, finihans nosse
  vêre.
MATIEU (<u>i s'drèsse</u>) - Ine munute divant çoula.
   (tot d'hant coula, i va d'vès l'pwète dè l'couhène)
LI DOCTEUR - Wice vas-se ?
MATIEU - Dji va loukî à mes crompîres po qu'èle ni broûlèsse nin.
        (i sôrtèye on moumint èt r'vint ossi vite)
LI DOCTEUR - Tes crompires sont-èle cûtes ?
MATIEU - Nin co... (i prind s'vêre)... Tot ratindant, à t'santé.
LI DOCTEUR - A t'santé èt asteure, i fat qu'dji cours èvôye po dîner. mi
  ossu.
MATIEU - Alans-1 èt dj'r'vinrè fini l'meune.
```

(i buvèt leû vêre, adon i sôrtèt tos les deûs èt Matieû rinteûre tot djusse come Mèliye èl houke di d'vins les coulisses)

```
SCIN.NE 6 : Matieû adon Roger, si bê-fi
```

LI VWES D'A MELIYE DIVINS LES COULISSES - Matieû ?... MATIEU ? MATIEU (<u>i droûve li pwète qui mon.ne dizeûr</u>) - Awè, Mèliye.

LI VWES D'A MELIYE - Poquè n'rèspondez-ve nin ?

MATIEU - Dji rèminéve li docteur.

LI VWES D'A MELIYE - Et l'diner ?

MATIEU - I cût, m'fèye.

(à c'moumint-là, on sone)

LI VWES D'A MELIYE - Ni sone-t-on nin, Matieû ?

MATIEU - Siya, m'fèye, dji va vèyî qui qu'c'est.

(i laît l'pwète à ladje, va-st-è colidor èt r'vint avou Roger tot fant qu'Mèliye braît :

LI VWES D'A MELIYE - Qui est-ce, Matieû ?

(Roger fait sène à Matieû dè dîre qu'i n'est nin là)

MATIEU - On martchand, m'fèye, ci n'est rin.

(i r'sére li pwète, rivint tot près d'Roger)

MATIEU - Qué novèle di v'vèyî, m'fi ?

ROGER - Dji pinséve qui Colète èsteût co chal.

MATIEU - Nèni, èlle è-st-èvôye dispôy on moumint. Et vos, kimint v'va-t-i?

ROGER - I m'va bin.

MATIEU - Et d'wice vinez-ve ?

ROGER - Dj'a stu djouwer m'belote come tos les sèm'dis. Et vos, çoula va-t-i ?

MATIEU - Todi pus mã.

ROGER - Poquè, mi bèle-mére ni va nin mîs ?

MATIEU - Vos l'avez bin vèyou pusqui v's avez rèscontré l'docteur adon qu'i sôrtéve fou d'chal.

ROGER - Mins qu'a-t-èle, parèt ?

MATIEU - Rin.

ROGER - Kimint coula, rin ?

MATIEU (<u>i mète si deûgt so s'front</u>) - C'est là qu'çoula s'passe, mi fi. Li docteûr vint co d'm'èl dire, c'è-st-ine malade imaginaire, come on scriyeû qui s'nome Moliére l'a dit.

ROGER - C'est l'docteur Minèt qui v's a dit çoula ?

MATIEU - Avè.

ROGER - Mins k'mint l'sét-i ?

MATIEU - Pace qui tos les examins qu'elle a passé à l'ospita ont prové qu'elle esteut ossi hétèye qu'ine trûte.

ROGER - Et qui polez-ve fé ?

MATIEU - Rin, fé l'manèdje.

ROGER (i mète si main so li spale d'à Matieû) - Pauve papa !

MATIEU - A qui l'dihez-ve, mi fi, dji...

(à c'moumint-là, li vwès d'à Mèlîye vint des coulisses)

LI VWES D'A MELIYE - MATIEU ?

(<u>Matieû va drovi l'pwète</u>)

MATIEU - Awè, m'fèye.

LI VWES D'A MELIYE - Et m'dîner ?

MATIEU - Dji v's èl monte, mi fèye.

(i mète si deugt so s'boke po fé sène à Roger dè n'nin moti, va-st-è couhène. Roger èsprind 'ne cigarète quand Matieu r'vint avou on

plate so lisquéque il a mètou l'dîner d'à Mèlîye. I fait hossî s' tièsse tot sortant po l'pwète qui mon.ne dizeur dismètant qu'Roger louke atoû d'lu tot foumant. Adon Matieû r'vint, sére li pwète po-dri.lu èt s'rassit è fauteûy) MATIEU (i sospire) - Et volà m'vèye, mi fi ! ROGER - Et c'est tos les djoûs parèy? MATIEU - Nèni, ureûs'mint, ci n'est qui l'sèm'di qwand l'docteûr lî a a fait s'piqueûre qu'èle dîne è s'lét. ROGER - Et bin, dji v'plains, mins asteure, il est timps qu'dji m'save. Colète mi ratind po dîner.
MATIEU - Awè, m'fi, èt s'magnîz bin. ROGER - Et vos ? MATIEU - Qwè, mi ? ROGER - Qu'alez-ve magni. MATIEU - Dji n'magn'rè nin, dji n'a nin faim. ROGER - Mins fat magni ! MATIEU - Oh ! dji sop'rè tot-rade avou m'feume. ROGER (i va d'vès l'pwète) - Adon, disqu'à onk di ces djous. MATIEU (i s'drèsse) - Dji va-st-avou vos disqu'à so l'soû po sèrer l'ouh. (i sortet et Matieu r'vint et va drovi l'radio qu'i fait-st-aler mins nin trop fwert. On moumint s'passe et 'ne fey di pus' li vwes d'à Mèliye èl houke co) LI VWES D'A MELIYE - Matieû ? ... MATIEU ? (Matieû va drovi l'pwète) MATIEU - Awè. LI VWES D'A MELIYE - Volez-ve bin monter ? MATIEU (tot sortant) - Dj'arive. on moumint s'passe et Matieû rinteûre avou Melîye qu'i tint po l'brès' po l'miner disqu'a fauteûy èt Mèlîye s'assèye) SCIN.NE 7 : Matieû - Mèliye MATIEU - Vos poliz bin tant braîre po-z-aveûr vosse dîner, vos n'avez quasi rin magni. MELIYE - Dji v'dimande pardon, Matieû, mins qwand dj'a vèyou l'platê so m'lét, dji n'aveû pus faim èt dj'n'a magnî qu'ine bètchêye. MATIEU - Poquè, ci n'esteut nin bon ? MELIYE - Siya, mins coula n'dishindéve nin. Et vos, avez-ve magnî? MATIEU - Nèni co. MELIYE - Poqwè ? MATIEU - Pace qui dj'so come vos, dji n'a nin faim. MELIYE - Poqwè, c'est l'docteûr qui v's a côpé l'apétit tot djåsant avou vos ? MATIEU - Nèni. MELIYE - Mins v's avez djåsé? MATIEU - Come tofér qwand i vint. MELIYE - Et d'qwè avez-ve djasé ? MATIEU - D'ine sor èt l'aute. MELIYE - Et come tofér, i v's a co dit qu'i n'trovéve nin çou qu'dj'aveû ? MATIEU - Bin awè, qui volez-ve qu'i dèye, èt n'djasans pus d'coula, Mèlîye, dji v's è prèye, nos n'fans qu'çoula tos les djoûs.

MATIEU (i va d'vès l'pwète dè l'couhène) - Dj'î va, m'fèye.

MELIYE - Vos avez raison, mi-ome, alez-me pus vite quèri 'ne jate di cafè ?

(Matieu mousse è l'couhène èt r'vint avou 'ne jate di cafè qu'i done à Mèliye)

MATIEU - Tenez, mifèye, mins c'est l'dièrin.ne, dj'a d'vou r'mète di l' êwe à tchafer po 'nnè poleur rifé.

MELIYE - Vos avez bin fait pace qui...

(On some)

MATIEU - Qui est-ce co ?

MELIYE - Alez' veyî, c'est co mutwet on martchand come tot-rade. (Matieû va vès l'colidôr èt rinteûre avou Ortense)

SCIN.NE 8 : Matiet - Meliye - Ortense

MELIYE (tot stindant ses mains) - Ortense!

ORTENSE (èle prind les mains d'à Mèlîye adon èle si rabrèssèt totes les deûs) -Awè, soûr, c'est mi.

(Ortense si r'drèsse)

MELIYE - Vos n'vinez nin sovint.

ORTENSE - C'est qu'dji n'a wêre di timps avou l'cinse èt qu'Victôr a mèzahe di mi po l'aidi.

MELIYE - Dj'èl sé bin, mins n's èstans binahes di v'vèyî, èdon, Matieû ? MATIEU - Ortense èl sét don, mins èle tome ma, nos n'avans rin chal.

ORTENSE - Dji n'a mèzahe di rin, Matieû, ine jate di cafè, c'è-st-assez.

MATIEU - Nèni, nèni, dji va qwèri 'ne dorêye èt tant qu'a cafè, l'êwe po l'fé est djustumint so l'feû.

ORTENSE - Mins ni v'dèrindjîz nin por mi !

MATIEU - I n'a nou dérindj'mint, dj'ènn'a po deûs-treûs munutes, li patis'rèye est d'l'aute de costé de l'rowe... Mins qui volez-ve come dorêye, ine blanke ou eune as frûtèdjes.

ORTENSE - Prindez çou qu'vos volez, Matieû.

(Matieû sôrtèye)

SCIN.NE 9 : Mèliye - Ortense

ORTENSE - Il est todi ossi binamé, èdon, Matieû!

MELIYE - Awè, soûr, ureûs'mint qu'dji l'a.

ORTENSE - Poquè, vos n'alez nin mis ?

MELIYE - Nin mîs, c'est todi pés, volez-ve dîre !

ORTENSE - Mins vos d'vrîz fé 'ne fwèce.

MELIYE - Dji vôreû bin, mins dji n'pou.

ORTENSE - Mins qu'avez-ve ?

MELIYE - Qui sé-dje, don, mi, les docteurs ni trovèt rin. ORTENSE - C'est tot l'minme drole!

MELIYE - Po l's autes, mins nin por mi, vos m'polez creûre.

ORTENSE (èle rabrèsse Mèliye) - Dji v'comprind, soûr.

(come èle dit coula, Matieû rinteûre avou les dorêyes)

SCIN.NE 10 : Mèlîye - Ortense - Matieû

MATIEU (i mète les dorêyes so l'tave) - Volà les dorêyes èt dj'va fé l'cafè, l'êwe deût boûre... (come Ortense si drèsse)... Nèni, Ortense, dimorez tot près d'vosse soûr, pôr qui dj'a l'abitude.

(coula dit, i mousse è l'couhène èt r'vint avou des assiètes, des jates, des fortchètes èt des coûtes èt i mète li tave)

ORTENSE (tot soriyant) - Mins, Matieû, n'aveût nin mèzahe... MATIEU - Vos, Ortense, dji v's a dit dè d'morer wice qui v's èstez.

```
(i r'mousse è l'couhène èt r'vint avou l'cafè èt on p'tit pot d'
      lèsse, èlzè mète so l'tave, rimousse è l'couhène èt r'vint avou
      ine aute pot)
MATIEU - Et volà l'souke. Asteure, dji va fé l'chèrvice.
         (i diswalpêye les dorêyes, les côpe èt mète on bokèt so les
          assiètes. Coula fait, i done ine assiète à Ortense, eune
          à Mèliye et prind eune por lu qwand il a chervou l'cafe.
MATIEU - Dè souke, Ortense ?
ORTENSE - Deus bokèts, Matieu, s'i-v'plait.
MATIEU - Et vos, Mèliye, on bokèt come tofér. Et asteure, bon apétit.
MELIYE - Mèrci, mi-ome, dji so fîre di vos.
MATIEU - Oh! ci n'est rin d'coula... Mins, vos, Ortense, vosse Victôr,
  kimint s'fait-i qu'i n'a nin v'nou avou vos ?
ORTENSE - I n'aveût nin l'timps.
MATIEU - Adon, vos li rèpwer'trez 'ne doreye di m'part.
          (i d'hèt tot coula tot magnant leû bokèt d'dorêye)
ORTENSE - Dji v'rimèrcihe por lu èt èlle est bone li dorêye.
MELIYE - Volez-ve co on bokèt, soûr ?
ORTENSE - Nèni, mèrci, Mèlîye. À réze, dji n'mi det nin astardjî trop' pace
  qui m'train ni m'ratindrè nin.
MATIEU - Vos avez co tot l'minme li timps dè beûre vosse jate di cafè ?
ORTENSE - Awè, mins nin trop'.
MATIEU - Adon, dihez-me on pô, à l'cinse, kimint çoula va-t-i ?
ORTENSE - Bin...
       (come èle si taît, c'est Matieû qui djase)
MATIEU - Bin qwè ?
ORTENSE - Coula n'va nin trop reût, Matieû.
MATIEU - Poquè ?
ORTENSE - C'est qu'i nos fareût 'ne novèle machine èt qui l'banque nos d'mande
  si tél'mint des intérêts qu'nos n'el saris atch'ter.
MELIYE - Et v's avez tûzé à nos-autes ?
ORTENSE - Awè, soûr, mins nos v'rèboûrsèy'rans, savez.
MATIEU - Dj'enne dote nin, Ortense, ossu vos n'avez qu'à dire à Victor di
  m'vini trover, nos arindj'rans coula.
ORTENSE - Oh ! merci, Matieû!
MATIEU - Buvez todi vosse jate di cafè èt n'djasans pus d'coula.
         (i buvèt leû jate di cafè èt Ortense si drèsse)
  avou mi. So c'timps-là, les omes s'arindj'ront èssonle.
  mèrci, èdon, Matieû.
```

ORTENSE - Asteure, il est m'timps, savez, sour, èt dji m'rafèye d'apwèrter l'bone novèle à Victôr.

MELIYE - A wè, Ortense, èt quand i vinrè, vinez avou lu, vos d'meurez chal

ORTENSE (èle rabrèsse Mèliye) - Awè, soûr... (èle rabrèsse Matieû)... Eco

MATIEU - Ci n'est nin po coula, mins... (i va-st-à l'tave, èwalpaye ine dorêye)... n'roûvîz nin l'dorêye po Victôr èt s'buvez 'ne bone botèye di vin tot l'magnant.

ORTENSE - Nos l'beûrans, Matieû.

(èle prind l'dorêye, va d'vès l'colidôr èt Matieû va-st-avou lèye èt r'vint on pô après)

SCIN.NE 11 : Meliye - Matiet

MELIYE - Et volà !

MATIEU - Volà qwè ?

MELIYE - Volà poquè qui m'soûr a v'nou, po l'machine.

MATIEU - Et après pusqui n'l'polans fé. Adon, c'est tot l'minme vosse soûr èt tant qu'à Victor, dji so sûr qu'i m'pay'rè.

MELIYE - Dj'ènnè so sûre ossu et vos avez bin fait, mins c'est damadje qui dji n'veû may Ortense qui qwand èlle a mèzahe d'ine saqwè.

MATIEU - Crèyez-me, Mèlîye, i vat mîs qu'ci seûye lèye qu'aye mèzahe di nos-autes qui nos-autes mèzahe di lèye. Çoula dit, dji va wèster l'tâve. MELIYE - Alez pus vite riqwèri l'platê d'zeûr.

MATIEU - C'è-st-ine bone îdèye, come vos n'avez quasî rin magnî èt qu' dji n'a nin dîné, dji rèstchafrè tot çoula po m'soper.

(i va d'vès l'pwète, on p'tit moumint s'passe, adon on ètind Matiet qui barlôzêye à l'valêye dè l'montêye avou l'platê tot brèyant :

MATIEU - MELIYE !... MELIYE !

MELIYE (èle di drèsse foû di s'fauteûy èt coûrt divès l'pwète qu'èle

droûve tot brèyant lèye ossu : "MATIEU !"

(coula dismètant qui...

LI TEÛLE TOME

DE ÛZINME AKE

Minme dècôr qu'à prumîr ake. Qwand l'teûle si lîve, Matieû è-st-assiou è s'fauteûy èt il est tot seû so l'scin.ne. Li posse di radiyo djowe tot n'alant nin trop fwért èt Matieû lét s'gazète tot foumant on cigare. A costé di s'fauteûy, i-n-a 'ne pitite tâve avou on platê po mète les cindes di s'cigare èt aspoyèye conte dè fauteûy, ine crosse avou in-aspoya po l'coûde come les djins qu'ont 'ne djambe cassêye si chèrvèt. Et tant qu'à Matieû, il a s'djambe dreûte divins on plate èt s'djambe est stindowe so 'ne tchèyîre. So l'arma, ine breune botèye, c'est l'botèye qui vint dè farmacyin, èt on p'tit vêre à costé dè l'botèye.

On p'tit moumint s'passe ainsi èt on sone.

SCIN.NE 1 : Matieû - Mèlîye adon Roger

Là qu'on a soné, Mèlîye vint foû dè l'couhène, va d'vès l'pwète qui mon.ne èt colidôr so l'timps qu'Matieû r'plôye si gazète èt mète cisse-chal so ses gngnos. Adon Mèlîye rinteûre avou Roger.

MATIEU - Roger !

ROGER - Awè, bê-pére, c'est mi.

MATIEU - Quéle surprise, èdon, Mèliye!

MELIYE - Po çoula, c'ènn'èst eune, c'est vrêye, pace qui nos v'vis ratindîs nin, dji pinséve minme qui c'èsteût l'docteûr.

ROGER - Pace qu'i deût v'ni oûy ?

MELIYE - Awè, tos les sèm'dis, come i féve avou mi, mins i-n-a nole eûre, come todi.

ROGER - Et qui vint-i fé po 'ne djambe cassêye ?

MATIEU - Rin, m'fi Roger, i vint djaser on pô avou mi.

ROGER - Oh! ci n'est qu'çoula, çou qui vout dire qui dji n'dèrindje nin?
MELIYE - Nèni, non, m'fi, èt pusqui vos èstez chal, dj'ènnè va prôfiter
po-z-aler qwèri po fé m'dîner, mi... (èle va vès l'pwète dè l'couhène,
èle s'arèstêye, si r'toûne)... Mins dj'a roûvî di v's èl dimander, èt

Colète wice è-st-èle ?

ROGER - Lèye ossu profite qui c'est sèm'di po fé ses comissions èt èle mi vinrè r'trover å Cafè dè Brèsseûs.

MELIYE - Et les èfants ?

ROGER - I sont-st-avou lèye.

MELIYE - Et bin pusqui v's avez v'nou tot seû oûy, vos vinrez turtos djâdi po dîner avou nos-autes pusqui c'est l'Asincion.

ROGER - C'est promètou, nos vinrans.

(Mèlîye mousse è l'couhène èt r'vint avou s'filèt tot djusse come Matieû d'mande à Roger:

MATIEU - Et vos, m'fi, kimint v'va-t-i ?

ROGER - I m'va bin, mins c'est...

(come Mèlîye est d'djà d'lé l'pwète, Matieû côpe Roger)

```
MATIEU - Mèliye ?
MELIYE - Qu'i-n-a-t-i, mi-ome ?
MATIEU - Mi botèye po-z-aler a farmacyin.
MELIYE (tot-z-alant prinde li botèye so l'arma èt tot l'mètant è s'filèt) -
  Vos fez bin d'm'èl rap'ler, dji l'aléve roûvî.
      (èt èle sortèye)
                    SCIN.NE 2 : Matieû - Roger
MATIEU (i ralome si cigare) - Qui m'alîz-ve dire, mi fi Roger, qwand dji v's
  a côpé ?
ROGER - Rin d'grave, bê-pére, c'est qu'les afaîres sont deures.
MATIEU - Qui volez-ve, c'est l'crîse.
ROGER - Awè, èt 'ne fameûse èco. Mins vos, çoula va co ? .
MATIEU - Come vos l'vèyez, mi djambe so l'tchèyîre.
ROGER - Mins v'n'avez nin dè ma ?
MATIEU - Nèni.
ROGER - Cou qui m'èware li pus', c'est m'bèle-mére, dj'ènnè r'vins nin co
  dè vèy come èlle est !
MATIEU - Ci n'est nin malahèye pusqui èle n'aveût rin.
ROGER - Kimint rin ?
MATIEU - Bin neni, Colète vis l'a d'vou dire come dji lî a dit, li docteur
  aveût raîson, c'èsteût-st-ine îdèye qu'èle si boutéve è l'tièsse èt il
  a falou qu'dji m'cassasse ine djambe po qu'èle s'ènnè rindasse compte.
  Mins vos ?
ROGER - Qwè mi ?
MATIEU - Vos n'avez nin stu djouwer vosse belote oûy?
ROGER - Vos l'vèyez bin pusqui dj'so chal.
MATIEU - Çou qui fait qu'vos n'avez nin minme situ beûre on vêre ?
ROGER - Néni, mins dj'beûrè onk tot-rade avou Colète.
MATIEU - Vos polez beûre onk asteûre, si vos volez.
ROGER - Asteure !
MATIEU - Poqwè nin ?
ROGER - Kimint, vos avez dè l'bîre chal?
MATIEU - Vos n'avez qu'à-z-aler è frigo, ènn'a èt èlle est bin frisse...
  (come Roger s'drèsse èt va d'djà d'vès l'pwète dè l'couhène)... Et prindez-
  'nnè eune por mi èt n'roûvîz nin dè prinde des vêres, i-n-a-st-è l'arma.
    (Roger mousse è l'couhène èt Matieû sorèye tot-z-aspoyant s'tièsse
     so l'poyîre di s'fauteûy èt tot sètchant so s'cigare come in-ome
     qu'è-st-ureûs. Et Roger rinteûre avou deûs botèyes di bîre èt deûs
     vêres)
ROGER - Volà l'bîre èt les vêres, mins dj'n'a nin trové l'clé po drovi les
  botèyes.
MATIEU (i mosteure li ridan de p'tit meube) - Elle deut esse è ridan.
         (Roger va prinde li clé, droûve les botèyes èt chève les vêres)
ROGER (tot d'nant on vêre à Matieû) - Vos polez beûre dè l'bîre, parèt.
  asteûre ?
MATIEU - Mîs qu'çoula, dj'ènnè deûs beûre... (èt i beût on côp di s'vêre)
ROGER (i beût on côp lu ossu) - Poqwè?
MATIEU - Pace qui l'docteur èl vout.
ROGER - Li docteur !
MATIEU - Awè, l'docteûr èt deûs-treûs vêres so l'djoûrnêye èco.
```

ROGER - Mins poquè ?

ROGER - Kimint po vos reins ? MATIEU - Po m'fé pihî si vos inmez mîs pace qui dji n'bodje nin assez. ROGER - Mins portant m'bèle-mère a d'moré sî meûs è s'fauteûy èt l'docteûr ni lî a mây fait beûre de l'bîre ! MATIEU - C'est dôminé, èle ni l'inme nin èt èle buvéve di l'êwe. ROGER - Et vos, c'est dè l'bîre ? MATIEU - Qui volez-ve, come on l'dit tofér, on cwérps n'est nin l'aute. ROGER - Mins vos bodjīz tot l'minme ? MATIEU - Avou m'cane, awè, mins dji n'va nin roter chal ava l'plèce. ROGER - Et v'n'avez nin trop målåhèye ? MATIEU - Dè l'djournêge, coula va co, mins c'è-st-à l'nute po monter les montêyes. ROGER - Et k'mint fez-ve ? MATIEU - C'est m'feume qui m'aîde. ROGER - Et bin s'on m'aveût dit coula i-n-a û djoûs, dji n'l'areû polou creûre ! MATIEU - Mi nin pus èt portant c'è-st-ainsi. ROGER - Mins c'est quast on mirake çoula ! MATIEU - I fat creûre qu'enn'arive co d'timps-in-timps. So coula près, buvans nosse vere et v's îrez r'qweri deus autes boteyes et r'prinde ces deûs chal po lzè mète è banstê qu'est tot près dè frigo. ROGER - A vosse santé ainsi. MATIEU - A vosse santé, m'fi. (i buvèt leû vêre ou pus vite èl finihèt là qu'il avît d'djà bu on cop, adon Roger s'drèsse, prind les botèyes, va-st-è l' couhène, rivint avou dess autès botèyes, rimplihe les vêres èt s'rassit tot d'hant : ROGER - Et m'mon-onke Victor ? MATIEU - Qwè, vosse mon-onke Victor ? ROGER - E-st-i sètchî foû di spèheûr ? MATIEU - Qui est-ce qui v's a djasé d'coula ? ROGER - Colète. MATIEU - Colète! ROGER - Awè. MATIEU - Et k'mint l'sèpéve-t-èle. ROGER - C'est s'mame qui li a dit qui s'soûr Ortense vis aveût v'nou trover là qu'Victor deut-st-atch'ter 'ne machine èt qu'i n'pout-st-aveur des çanses à mons dè payî trop'd'intèrèts. MATIEU - C'est bin m'feume çoula! ROGER - Poqwè ? MATIEU - Pace qui èle n'aveût nin à djaser d'coula, c'èsteût-st-ine afaîre inte Victôr èt mi. ROGER - Mins l'afaire è-st-arindjèye asteure ? MATIEU - Bin sûr, mi fi, dji n'poléve tot l'minme nin lèyî Victôr è marasse, ossu dj'l'î a prusté les canses qu'i lî faléve. Et d'vant notaîre, èco. ROGER - Poquè d'vant notaire ? MATIEU - C'est Victôr qui l'a volou èt come dji m'aveû cassé l'djambe, c'est l'clér di m'notaire qui m'a-st-apwèrté chal les papis po siner. ROGER - Vos avez bin faît, bê-pére, èt... (i n'finihe nin là qu'on sone)

MATIEU - Po mes reins.

MATIEU - Volez-ve bin aler droviért, Roger ?

ROGER (tot s'drèssant) - Dj'î va. (i sôrtèye èt rinteure ossi vite avou l'docteur Minèt)

SCIN.NE 3 : Matieû - Roger - Li docteûr

LI DOCTEUR (tot d'nant l'main à Matieû) - Qué novèle, Matieû ?

MATIEU - Va bin, mi, èt twè?
LI DOCTEUR - Li mîs dè monde... (i mète si main so li spale d'à Roger)...

Et come dji pou vèy, i-n-a t'bê-fi qui t'a v'nou t'ni k'pagnèye. MATIEU - E l'plèce d'aler djouwer s'belote, awè.

LI DOCTEUR - C'est bin binamé çoula, Moncheû Pîre, èt vos, kimint v'va-t-i. ROGER - Fwért bin, docteûr.

LI DOCTEUR - Et vosse feume, èt les éfants ?

ROGER - Mi feume n'a nin co mèzahe di vos èt les èfants crèhèt.

MATIEU - Mins s'ti pous v'ni djûdi, t'èlzè pôrès vèyî là qui m'feume èlzî a dit dè v'ni turtos po dîner avou nos-autes.

LI DOCTEUR - Çoula m'f'rè bin plaîsîr èt pusqui ti djases di t'feume, kimint va-t-èle, Matieû?

MATIEU - Dji n'èl riknohe pus, èlle è-st-èvôye fé ses comissions èt ti dîreûs qu'elle a r'trové ses djambes di vingt ans dispôy qui dj'a l'meune so l'tchèyîre. N'est-ce nin vrêye, Roger?

ROGER - Oh! siya qu'c'est vrêye ca qwand dj'l'a vèyou tot-rade, dj'ènnè crèyéve nin mes oûy.

MATIEU - Tot çoula, c'est bin bê, m'fi, mins l'docteur a mutwèt seu d'ine bîre, lu ossu, Qu'ènnè dis-se, Houbert?

LI DOCTEUR - Dji n'dîrè nin nèni.

MATIEU - Adon, si v'volez bin, Roger, alez' qwèri 'ne bîre po l'docteur èt s'prindez-nnè eune por vos si v's avez co seu.

ROGER (tot-z-alant è l'couhène) - Nèni, mèrci, nin asteure, dji beurè co eune tot-rade avou Colète à Cafè des Brèsseus èt come c'est mi qui deus miner l'auto.

(coula dit, i mousse è l'couhène)

SCIN.NE 4 : Matieu - Li docteur

LI DOCTEUR - Et à part çoula, ti n'ti plaîs nin trop ma è t'fauteûy ? MATIEU - Nèni, sés-se.

LI DOCTEUR - Et t'djambe ?

MATIEU - Ele s'èdwème di timps-in-timps, adon dji rote on pô.

LI DOCTEUR - Dji t'l'avet dit qwand dj't'a mètou t'plate.

MATIEU - Awè, mins n'djase nin d'coula d'vant m'bê-fi ca...

(à c'moumint-là, Roger rinteure avou 'ne botèye di bîre èt on vêre)

SCIN.NE 5 : Matieu - Li docteur - Roger

ROGER - Mande èscusse, savez, docteur, mins dji n'trovéve pus nou vêre èt dj'ènn'a d'vou rispamer onk.

MATIEU - Kimint, m'feume n'a nin fait les hièles ?

ROGER (tot disbouchant l'botève èt tot chèrvant l'vêre dè docteûr) - I fât creûre qui nèni... (i done li vêre à docteûr)... S'i-v'plaît, docteûr.

LI DOCTEUR - Mèrci, Moncheû Pîre... (i lîve si vêre)... Et à vosse santé d'à tos les deûs.

MATIEU - A t'santé, Houbert.

ROGER - A vosse santé, Docteur.

```
(i buvèt on côp adon l'docteûr dimande à Roger :
LI DOCTEUR - Et les afaires divins les assurances, Moncheû Pire, coula
  rote.
ROGER - Dj'a les pinses qui vos afaires rotèt mis qu'les meunes, Docteur.
LI DOCTEUR - Mins coula va tot l'minme.
ROGER - Awè, mins come dj'èl dihéve co tot-rade à m'bê-pére, c'est l'
  crise.
      (à c'moumint-là, Mèliye rinteûre)
                SCIN.NE 6 : Matieû - Li docteûr - Roger - Mèlîye
MELIYE - Tins, vos èstez là, Docteur!
       (tot d'hant coula, èle mète si filèt d'comissions so l'tave)
LI DOCTEUR - Come vos vèyez, Madame Legrand, dj'a v'nou vèyî k'mint qui
  m'malade aléve.
MELIYE - I va bin pusqu'i beût s'vêre di bîre avou vos-autes.
MATIEU - Dji n'poléve nin fé mons qu'dè fé vûdî on vêre di bîre, èdon,
  Mèlive.
MELIYE - Nèni, mi-ome, mins nin trop', vos l'sèpez bin.
MATIEU - Dji n'a wade, c'est prumir.
MELIYE - Adon si c'è-st-ainsi, c'est mi qui va chèrvi l'deûzinme.
          (èt èle prind s'filèt èt va d'vès s'couhène tot fant qu'Roger
           dit:
ROGER - Nin por mi, savez, pace qui dji deûs-st-aler r'trover Colète èt
  les èfants.
MELIYE - Mins l'docteur beurè co bin onk, èdon, Docteur ?
LI DOCTEUR - Awè, Madame Legrand.
MELIYE - Et vos. mi-ome ?
MATIEU - Dji n'va nin lèyî beûre li docteûr tot seû.
MELIYE (tot droviant l'pwète di s'couhène) - Adon dj'ènn'apwète deûs...
  (èle mousse è l'couhène èt r'vint avou deus botèges di bire èt l'botège
   dè farmacyin qu'èle mète so l'arma)... Volà vosse botèye, mi-ome.
LI DOCTEUR - El print-i bin come dji li a rikmandé, ine dimèye eûre
  divant dè magni.
MELIYE - Oh ! po çoula, i n'èl roûvèye may... (èt èle porsût tot chèrvant les vêres di bîre)... À réze, si èl roûvîz-ve, dji n'èl roûvèye nin,
  mi.
        (èle done li vêre di bîre a docteûr)
MELIYE - S'i-v'plaît, docteûr.
LI DOCTEUR - Mèrci, Madame Legrand.
MELIYE (tot d'nant on vêre à Matieû) - Tènèz, mi-ome... (à Roger)...
  C'est vrêye qui vos n'volez nin beûre, Roger ?
ROGER - Nèni, il est timps qu'dj'ènnè vaye, dji n'a d'djà d'moré qui
  d'trop'.
    (coula dit, i s'drèsse, mète si vêre so l'tave, rabrèsse Mèliye
     so l'tchife tot d'hant :
ROGER - A r'vèy, mame.
MELIYE - Å r'vèy, mi fi, èt n'roûvîz nin dè v'ni djûdi avou Colète èt
  les èfants.
ROGER (tot-z-alant vès Matieû) - N'ayîz' nole sogne, nos vinrans... (i sére
  li main d'à Matieû)... Disqu'à djûdi ainsi, bê-pére.
MATIEU - Awè, Roger.
```

LI DOCTEUR - Awè, Moncheû Pîre, si dj'pou v'ni, dji vinrè.

ROGER (i done li main à docteur) - Et vos ossu, Docteur, disqu'à djudi.

(èt Roger sôrtèye)

SCIN.NE 7 : Matieu - Li docteur - Mèliye

LI DOCTEUR - On brave valèt, èdon, Madame Legrand ?

MELIYE - Oh ! po çoula, vos l'polez dire, docteur, nosse fèye areut polou pus ma toumer, n'est-ce nin vrêye, mi-ome ?

MATIEU - Vos avez raison, Mèliye, Roger est fleur di brave ome, èt corèdjeus avou coula.

LI DOCTEUR - Et twè ossu, t'es corèdjeus avou t'djambe cassêye.

MELIYE - Vos fez bin dè djaser di s'djambe, docteur, kimint va-t-èle ? LI DOCTEUR - Coula, dji n'vis èl saret dîre, Madame Legrand, may nou docteur n'a polou vèyî houte d'on plate.

MELIYE - Mins à voste îdèye ?

LI DOCTEUR - Coula sût s'coûse, les ohês s'divèt r'sôder d'à façon là qui l'casseure èsteut bèle.

MELIYE - Pace qu'i-n-a des laîdes, parèt ?

LI DOCTEUR - Awè, Madame Legrand, il arive minme qu'i fât-st-opèrer.

MELIYE - Et po k'bin d'timps 'nn'a-t-i co ?

LI DOCTEUR - Dj'a les pinses qui d'vins treûs samin.nes...

MELIYE - Treûs samin.nes !

LI DOCTEUR - Bin awè, Madame Legrand, ine djambe cassêye ni s'riwèrihe nin so û djoûs.

MELIYE - Et d'vins treûs samin.nes, vos sarez què ?

LI DOCTEUR - Awè, qwand il arè r'passé 'ne radiyo avou l'profèsseur Molin. Mins, si vos volez bin, lèyans là l'djambe d'à Matieû èt d'hez-me on pô, vos avez l'aîr d'èsse come ine djone, vos !

MELIYE - Come ine djone, ni brèyez nin trop fwért, si dj'so so pid èt si dj'fais tot l'ovrèdje chal, c'est pace qu'i fât bin.

LI DOCTEUR - Vos n'inmez nin mis çoulà qu'd'èsse è vosse fauteûy come vos l'èstiz ?

MELIYE - Oh ! siya, mins dj'ènnè r'vin nin co todi d'aveûr avu l'fwèce di m'drèssî foù di m'fauteûy èt dè cori disqu'ad'lé Matieû qwand il a barlôzé à l'valêye des montêyes avou m'plate! Mins, dj'èl dis co, dji n'comprind nin.

LI DOCTEUR - I fat creure qui c'è-st-à ç'moumint-là qu'les piqueures qui dji v'féve ont fait d'l'èfèt.

MELIYE - El fat creûre pusqui dispôy ci djoû-là, dj'ènn'a pus mèzahe. Et asteure, di va fé çou qu'mi-ome féve quand dj'èsteu è fauteuy come il 1 è-st-asteure, dji va disbaler mes comissions à mons qu'vos n'volez' co 'ne bîre ?

LI DOCTEUR - Nèni, mèrci, Madame Legrand.

MELIYE (tot-z-alant è l'couhène) - Dji v'va todi apwèrter 'ne botèye qui vos n'candjîz' d'îdèye.

(èle sortère tot fant qu'Matieû èt l'docteur fèt 'ne fwèce po n'nin rîre èt èle rivint avou 'ne botèye di bîre qu'èle mète so l'tave)

MELIYE - Volà, docteur, mins vos v'chèv'rez vos-minme. LI DOCTEUR (so l'timps qu'Mèlîye rinteure è l'couhène) - Dji veure, Madame Legrand.

SCIN.NE 8 : Matieû - Li docteûr

MATIEU (tot soriyant) - Dis, Houbert, t'el chev're tot l'minme, hein, nos beurans l'mitan chaskeun'.

LI DOCTEUR - Et poquè ?

MATIEU - Pace qui c'est twè qui m'a fait d'morer avou 'ne djambe so 'ne tchèyîre...èt 'ne djambe qui n'est nin minme cassêye.

LI DOCTEUR - Poquè, ti n'as nin bon ?

MATIEU - Mi, dji so come on pèhon è l'êwe, mins d'vins treûs samin.nes.

LI DOCTEUR - Qwe, d'vins treûs samin.nes ?

MATIEU - Bin awè, si dji pou roter.

LI DOCTEUR - Et adon ?

MATIEU - Adon, come dji k'nohe Mèlîye èt qu'dj'a fait tot l'manèdje sî meûs, èle mi dîrè qui dj'n'a qu'à l'aîdî èt po fé m'belote come dj'èl féve d'avance, ci sèrè buscûte.

LI DOCTEUR - Nèni, hein, Mèlîye ni f'rè nin çoula.

MATIEU - C'est twè qu'èl dis, nos l'veurans bin, mins...

(à c'moumint-là, Mèliye vint foû dè l'couhène)

SCIN.NE 9 : Matieû - Li docteûr - Mèliye

MATIEU - Qu'i-n-a-t-i, don, Mèlîye ?

MELIYE - Çou qu'i-n-a, i-n-a qu'dj'a roûvî d'atch'ter 'ne salade.

MATIEU - Kimint, vos n'avîz nin fait vosse lisse.

MELIYE - Nèni.

MATIEU - Et portant, qwand c'esteût mi qui féve les comissions, vos m'fîz tofér ine lisse.

MELIYE - Pace qui v'n'avîz nin l'abitude.

LI DOCTEUR - Djans, Madame Legrand, çou qui v's arive pout-st-ariver à tot l'monde qwand on a d'moré si meûs d'vins on fauteûy sins pus fé nole comission.

MELIYE - Vos avez raison, docteûr, mins dji v'vôreû bin d'mander 'ne saqwè d'vant d'aler qwèri m'salade.

LI DOCTEUR - Dji v's è prèye, dimandez ?

MELIYE - Poquè fat-i qu'mi-ome prinse li vêre di s'botèye avou de l'glèce ? LI DOCTEUR - Pace qui c'è-st-on méde qui s'deût prinde fwért freûd.

MELIYE - Aha!

LI DOCTEUR - Poqwè, coula v'dèrindje ?

MELIYE - Nèni, mins avou çoula, i fât qu'dj'aye tofér dè l'glèce è frigo.

LI DOCTEUR - Ele si fait tote seule, èdon.

MATIEU - Çou qu'Houbert dit est vrêye, ossu, alez' qwèri vosse salade èt s'prindez 'ne blanke dorêye po dessêrt.

MELIYE (tot-z-alant vès l'pwète dè colidor) - Dj'î va, mi-ome. Disqu'à tot-rade, docteur.

LI DOCTEUR - Ou disqu'à djûdi, Madame Legrand.

MELIYE - Poqwè, vos n'sèrez pus chal qwand dji r'vinrè ?

LI DOCTEUR - Dji n'è sé rin pace qui dj'deûs co vèy on malade divant dè rintrer.

MELIYE (èle droûve li pwète) - Adon disqu'à djûdi si v'n'èstez pus chal. LI DOCTEUR - Awè, Madame Legrand.

(Mèlîye sôrtèye)

SCIN.NE 10 : Matieû - Li docteûr

MATIEU - Et asteûre...

LI DOCTEUR - Asteure què ?

MATIEU (<u>i s'drèsse sins prinde si crosse</u>)-Asteure, nos alans beure on wiski nos deus pace qui l'bire, sés-se, por à l'botèye.

LI DOCTEUR (adon qu'Matieû va d'vès l'pwète dè l'couhène) - Wice vas-se ? MATIEU - Qwèri dè l'glèce so l'timps qu'ti fais l'discandje des botèyes. LI DOCTEUR - Et si t'feume riv'néve adon qu'ti rotes sins cane ? MATIEU - Ele n'est nin co chal, li martchand d'lègumes èst so l'boul'vard èt èlle ènn'a po quéquès munutes. (coula dit, i mousse è l'couhène, li docteur prind fou di s'potche ine botèye parèye à l'cisse qu'est so l'arma èt va discandjî les botèyes come Matieû rinteûre avou deûs vêres èt on bokèt d'glèce divins chaskeun'. I va disqu'à l'arma, si r'toune divès l'docteur qui s'a rassiou) MATIEU - C'est fait ? LI DOCTEUR - Awè, hein, c'est fait. MATIEU (tot droviant l'botèye) - Adon. (èt i chève deus wiskis, done onk a docteur èt s'rassèye è s'fauteuy) MATIEU - Et volà. LI DOCTEUR - Kimint volà ? MATIEU - Bin awè, dj'a m'wiski, ossu à nosse santé, Houbêrt. LI DOCTEUR - A l'tonk, pus vite, pace d'vins treûs samin.nes. MATIEU - Qu'i-n-arè-t-i d'vins treûs samin.nes ? LI DOCTEUR - Ti pôrès roter sins cane. MATIEU - Cou qui vout dire ? LI DOCTEUR (tot riyant) - Qui ti d'vrès mutwèt r'fé l'manèdje come ti l'as dit MATIEU - Dis, ça va, hein, saye qui dj'enn'aye tot l'minme po 'ne samin.ne ou deûs d'pus'. LI DOCTEUR - Dji f'rè m'possibe, mins po 'ne djambe cassêye, i n'fåt nin si longtimps po qu'èle si r'wèrihe. MATIEU - C'est bon, on veûrè bin. LI DOCTEUR (tot metant s'vere so l'tave) - On veure bin, come t'el dis, mins tot ratindant ... MATIEU - Qwè ? LI DOCTEUR - I fåt qu'dj'enne våye. MATIEU - Mins tot l'monde est prèssé po l'djoû d'oûy qwand on m'vint vèyî! LI DOCTEUR - Nèni, Matieû, mins ti m'as-st-oyou qwand dj'a dit à t'feume qui dj'aveû co on malade à vèyî. MATIEU - C'èsteût vrêye. LI DOCTEUR - Sûr qui c'esteût vrêye, poqwe? MATIEU - Dji pinséve qui ti blaguéves, mi. LI DOCTEUR - Dji n'blaguéve nin, ossu, èsprind on cigare èt s'ratind qui t'feume rivinse avou s'salade èt s'blanke dorêye. MATIEU (i stind l'main à docteur) - Pusqu'i fat bin, disqu'à djudi. LI DOCTEUR (i sére li main d'à Matieû) - Awè, Matieû, disqu'à djûdi mutwèt. MATIEU - Dis, Houbert, saye dè v'ni, c'est tot çou qu'dji t'dimande. LI DOCTEUR - Dji vinrè... (i va d'vès l'pwète)... avou t'wiski. (èt i sôrtèye)

SCIN.NE 11 : Matiet

Dimoré tot seû, Matieû s'drèsse, prind les vêres qu'avît chèrvou à beûre on wiski aveu l'docteûr et va-st-è l'couhène wice qu'i d'meûre on moumint. Adon i r'vint tot frotant ses mains, va prinde on cigare è l'bwète qu'est so l'arma, l'èsprind èt s'rassît po r'prinde si gazète et drovi cissechal. Il a-st-à pon ne fait coula qu'on sone. Matieû mète si cigare so l'platê, prind s'crosse qwand il est drèssî et va d'vès l'pwète qui

done è colidor. Et i rinteure avou Victor, si sorodje, tot s'aspoyant sp s' crosse. Victor a-st-on p'tit paquèt è s'main.

SCIN.NE 12 : Matieû - Victôr

MATIEU (tot-z-alant vès s'fauteûy) - Qué novèle dit'vèyî, Victôr ? VICTOR - Des novèles, c'est twè qu'ènn'as, ti vas mis asteure ? MATIEU (i s'assèye èt s'fauteûy, aspôye si cane disconte di ci-chal) - Come ti veûs là... (i mète si djambe so l'tchèvire)... come ine saqui qu' a-st-ine djambe cassêye. VICTOR - Couls dj'èl sé, Mèlîye l'a dit à Ortense a tèlèfone... Mins wice è-st-èle, Mèliye ? MATIEU - Elle è-st-èvôye qwèri 'ne salade èt 'ne dorêye, mins èle va rintrer d'ine munute à l'aute... Et twè ? VICTOR - Qwè mi ? MATIEU - T'es v'nou tot seû ? VICTOR - Nèni, Ortense a v'nou avou mi. MATIEU - Et poquè n'a-t-èle nin v'nou disqui chal? VICTOR - Elle profite qui n's èstans-st-è l'vèye po-z-atch'ter saqwants afaîres qu'èle mètre è cofe de l'vweture divant di m'vini r'trover... (i stind à Matieû li p'tit paquèt qu'i t'néve è s'main)... Mins tot ratindant qu'nos feumes sèyèsse chal, tins volà por twè. MATIEU - I n'faléve nin, hein, Victôr! VICTOR - C'est si pô d'tchwè après çou qu't'as fait por mi. MATIEU (i droûve li paquèt, c'è-st-ine bwète di cigares) - Des cigares èt les cis qu'dji fome d'abitude èco bin ! VICTOR - Dji k'nohe tes gos' dispôy les an.nêyes qui dj'vins chal. MATIEU (i done li bwète à Victôr) - El vous-se bin mète so l'arma, dj'ènnè prindrè onk qwand dj'arè foumî l'meun'... (come Victôr mète les cigares so l'arma)... Tant qu'à twè, s'ti vous beûre on vêre di bîre, i-n-a des botèyes è frigo, ti n'as qu'à t'chèrvi. VICTOR - Nin asteure, Matieu, si dj'so v'nou, c'est po prinde di tes novèles èt po t'rimerci 'ne fèy di pus' po çou qu't'as fait por mi. MATIEU - Ni djasans pus d'coula, est-ce binahe di t'novèle machine ? VICTOR - Dj'èl vou bin creûre èt po les pay'mints, n'aye nole sogne, hein, i sèront là tos les meûs. MATIEU - Tais'-tu avou tes pay'mints ou ti r'prindrès tes cigares. VICTOR - Awè, c'est bon, djasans d'twè. Qui dit-st-i l'docteur ? MATIEU - Qui dj'ènn'a co po quéquès samin.nes. VICTOR - Et qui prinses come droukes ? MATIEU - Rin saf ine botèye po les niérs, èlle est là so l'arma. VICTOR - Et c'est tot ? MATIEU - Nèni, dji deus beure deus-treus bires so l'djournême po fé ovrer mes reins. VICTOR - Et so l'timps qu't'es blèssi, Meliye est r'faite, lèye, Ortense mi l'a dit? MATIEU - Awè, valèt Victor, c'est drole, mins c'è-st-ainsi. VICTOR - Mins qu'a-t-èle avu qu'èlle a d'moré des meûs è s'fauteûy ? MATIEU - Rin. VICTOR - Ci n'est nin possibe! MATIEU - Siya, Victor, c'esteût-st-ine îdeye qu'ele si boutéve è l'tiesse

bin vrêye èt qui l'docteur aveut raison.

èt il a falou qu'dji m'cassasse ine djambe po qu'èle vèyasse qui c'èsteût

VICTOR - Et asteure ?

MATIEU - Ele rote come d'avande èt...

(à c'moumint-là, Mèlîye rinteure avou s'salade èwalpêye divins on papî èt 'ne bwète avou s'dorêye.

SCIN.NE 13: Matieu - Victor - Mèliye

MELIYE - Victôr !

VICTOR (i s'drèsse, va rabrèssi Mèliye so les tchifes) - Awè, Mèliye.

MELIYE (tot metant s'salade et s'dorêye so l'tave) - Tot seû ?

VICTOR - Nèni, savez, Mèlîye, Ortense est v'nowe avou mi, come dji l'a dit Matieû, mins èle atch'têye totes sôres d'afaîres divant di m'vini r'trover.

MELIYE - Mins poquè n'nos avez-ve nin prév'nou, vos arîz dîné avou nosautes, mins dji n'a-st-atch'ter qu'po Matieû èt mi.

MATIEU - Et v's avez mètou l'timps po-z-aler qu'eri 'ne salade èt 'ne dorêye! MELIYE - Qui volez-ve, mi-ome, dj'a toumé so Fifine qu'a stu tote èwarêye di m'vèyî èt n's avans djasé d'ine sôre èt l'aute. À réze, quand c'èsteût vos qui féve les comissions, vos d'morîz ot'tant d'timps qu'mi. Mins

dihez, Victôr?

VICTOR - Awè, Mèlîye.

MELIYE - Matieû v's a-t-i d'mandé s'vos volîz beûre ine saqwè ?

MATIEU - C'est sûr qui dj'lî a d'mandé, mins n'a rin volou!

MELIYE - C'èsteût po n'nin v'dèrindjî, mins dj'lî va chèrvi on bon vêre di bîre mi pace qui dji n'a qu'çoula. Dispôy qui dj'a toumé malåde, dji n'a pus volou vèyî chal ine botèye di wiski ou 'ne botèye di pèkèt.

VICTOR - Qui vas-se po on vêre di bîre, èt twè, Matieû ?

MELIYE - Matieû n'beûrè nin, Victôr, il a d'djà bu tot-rade avou Roger èt i n'deût beûre qui deûs-treûs vêres so s'djoûrnêye.

MATIEU - Po 'ne fèy à fé, Mèliye.

MELIYE - I n'a nin des po 'ne fèy à fé, dji va chèrvî on vêre di bîre à Victôr èt tant qu'à vos, come c'est vosse eûre, vos alez prinde vosse botèye.

MATIEU - Awè, c'est bon, mins n'roûvîz nin d'mète on bokèt d'glèce è vêre, èdon.

VICTOR - On bokèt d'glèce !

MELIYE - Awè, Victôr, pace qui, dji n'sé poqwè, i deût prinde on p'tit vêre di s'botèye treûs fèy li djoû èt i fat qu'i seûye bin freûd.

(coula dit, Mèlîye prind s'salåde, si dorêye èt va è l'couhène)

SCIN.NE 14 : Matieû - Victôr

VICTOR - Volà 'ne saqwè qui dj'n'a may vèyou, louke, mi !

MATIEU - Qwè ?

VICTOR - Mète on bokèt d'glèce po beûre on p'tit vêre d'ine botèye dè farmacyin.

MATIEU - Mi nin pus, valèt Victôr, mins c'est l'docteûr qui l'a dit.

VICTOR - C'est mutwèt on novê r'méde.

MATIEU (come Mèliye rinteure) - El fat creure.

SCIN.NE 15 : Matieû - Victor - Mèlîye

MELIYE - Qui fåt-i creûre, mi-ome ?

(tot d'mandant coula, èle va d'vès l'arma, rimplihe li p'tit vêre
qu'è-st-à costé dè l'botèye èt èle li vûde è vêre avou l'bokèt d'
glèce)

MATIEU - C'est Victôr qui d'héve qui m'botèye èsteût mutwèt on novê r'méde là qu'dj'èl deûs prinde avou dè l'glèce.

MELIYE (tot d'nant l'vêre à Matieû) - C'est çou qui l'docteûr a dit, Victôr, èt asteûre, dji va qwèri vosse bîre là qu'dj'a lèyî cori d'l'êwe è vêre po qu'ci-chal seûye bin fris'.

VICTOR - Mèrci, Mèlîye... (à Matieû dismètant qu'Mèlîye rinteûre è l'couhène)
... Ti n'beûs nin ?

MATTEU - Siya !

(<u>i beût s'vêre d'on côp èt èl mète so li p'tite tâve qu'est tot près di s'fauteûy come Mèlîye rinteûre avou l'vêre di bîre po Victôr èt èle lî done</u>)

MELIYE - Volà, Victor, èt à vosse santé.

VICTOR - Et à l'djôye di v'vèyî so pîd, Mèlîye.

MELIYE - C'est mi asteure qui v'deu dire mèrci èt...

(à c'moumint-là, li tèlèfone sone èt Mèliye va discrotchi)

MELIYE (å tèlèfone) - Alô! Chal Madame Legrand... Oh! c'est vos, Moncheû Kinèt!... Mi, ça va bin... Awè, il a falou l'timps, mins asteûre, çoula va... Bin sûr qu'il est chal, wice sèreût-i?... Dji lî va d'mander... (à Matieû)... C'est vosse camarade Marcel Kinèt qui d'mande si vos polez v'ni à tèlèfone.

MATIEU - Dj'arive.

(<u>i mète ses mains so les aspoyas di s'fauteuy po s'drèssî èt bodje si djambe djus dè l'tchèyîre</u>)

VICTOR - Vous-se qui dji t'aîde, Matieû ?

MATIEU (tot s'drèssant) - Nèni, dji f'rè bin... (i prind s'crosse là qu'i s' pout aspoyî d'sus avou s'coude èt s'main èt rote tot doûc'mint disqu'à tèlèfone).

MELIYE - Volà mi-ome, Moncheû Kinèt... Awè, å r'vèy. (èle done li tèlèfone à Matieû)

MATIEU (a tèlèfone) - Kimint, c'est twè, Marcèl !... Il est quasî timps qu'ti prinses di mes novèles... Wice èsteût-ce ?... Et l'Italiye !... Qu'as-se situ fé là, prinde des vacances?.. Oh ! po tes afaîres !... Et k'mint t'va-t-i ?... Mi, ça va come ine saquî qu's'a cassé l'djambe... Quî est-ce qui t'l'a dit ?... Mi bê-fi, dis-se, èt wice l'as-se vèyou ?... Ah ! t'es-st-a Cafè des Brèsseûs là qu'ti beûs on vêre avou lu, mi fèye èt les èfants !... Adon, beûs on vêre so m'compte tant qu'ti es... Li belote !... Dji n'è sé co rin, Marcèl, li docteûr dit qu'dj'ènn'a co po treûs ou qwate samin.nes... Awè, hein, nos 'nnè r'djow'rans asteûre qui m'feume est so pîd... Awè, Marcèl... Di qwè ?... Ine munute, dj'èl dimande à m'feume... (i s'toûne divès Mèlîye)... Marcèl dimande qwand i m'pout v'ni dîre bondjou avou s'feume?

MELIYE - Qwand i vout, èdon, mi-ome.

MATIEU (a tèlèfone) - Mi feume dit qu'ti pous v'ni qwand ti vous... Qwand ?... Dimain... (a Mèlîye)... Dimain, çoula v'dût-i, Mèlîye.

MELIYE - Bin, awè, dihez-lî qu'i v'nèsse po beûre li cafè.

MATIEU (a tèlèfone) - C'est d'acwérd, Marcèl, èt m'feume dit qu'ti n'as qu'à v'ni po beûre li cafè... Siya, siya, çoula nos f'rè plaîsîr... Awè, Marcèl, disqu'à d'main.

(Matieu racrotche èt va douc'mint r'prinde si plèce è s'fauteuy)

VICTOR - Qui est-ce, Matieû, si dji n'so nin trop curieûs ?

MATIEU - On camarade, ti l'as-st-oyou.

VICTOR - Et qui fait-i ?

MATIEU - Dîrècteur divins 'ne banque.

VICTOR - Et vos l'kinohez bin, vos, Mèlîye ?

MELIYE - Dji l'a d'djà vèyou qwand dj'aléve riqwèri Matieû å Cafè des Brèsseûs là qu'i djouwéve si belote so l'timps qu'dji féve saqwantès comissions. Asteûre, dji v'laîs vos deûs pace qui si dj'blague co avou vos-autes, mi dîner n'sèrè jamay prèt'.

(èt coula dit, èle rimousse è l'couhène)

SCIN.NE 16 : Matieu - Victor

MATIEU - Alèz, Victôr, beûs t'vêre èt vas-se co r'qwèri 'ne bîre è l'couhène, on n'rote nin so 'ne djambe.

VICTOR (tot s'drèssant) - Et twè ?

MATIEU - Nin por mi, t'a-st-oyou çou qu'Mèlîye a dit,dj'a d'djà bu tot-rade avou Roger. Mins vas-î, twè, èle ni t'dîrè rin.

(<u>Victôr inteûre è l'couhène èt r'vint avou 'ne botèye di bîre qu'est</u> disbouchêye)

MATIEU - Qui t'aveû-dje dit, rimplihe ti vêre èt done-mu onk di tes cigares si ti vous bin... (i prind s'vêre qu'il aveût mètou so li p'tite tave qu'è-st-à costé di s'fauteûy)... Et tant qu'ti es, vûde-mu co on p'tit vêre di m'botèye è l'meune divant qui l'glèce ni seûye fondowe.

VICTOR - Mins coula n'ti vas nin fé dè twért, nèni ?

MATIEU - Nèni, hein, pusqui c'est po mes niérs.

VICTOR - T'ènn'es bin sûr pace qui dji n'vôreû nin...

MATIEU (i s'tind s'vêre) - Vûde.

(<u>Victôr prind l'botèye</u>, rimplihe li p'tit vêre, prind on cigare è l' bwète qu'il a-st-apwèrté, va vûdî li p'tit vêre è ci d'Matieû èt done li cigare à Matieû)

MATIEU (i lîve si vêre) - A t'novèle machine, Victor.

VICTOR - Et à t'djambe po qu'èle seûye vite d'adrame... (coula dit, si beût on côp di s'vêre tot fant qu'Matieû beût l'sonk d'on côp)... Mins dis don, Matieû, est-ce si mava qu'coula qu'ti beûs t'vêre d'on côp?

MATIEU - Nèni, mins s'Mèlîye intréve èt m'vèyéve beûre on deûzinme, èle troûv'reût mutwèt çoula drole.

VICTOR - Poqwè ?

MATIEU - Ti k'nohes Mèlîye, hein, li docteûr a dit treûs so l'djoûrnêye èt por lèye, ci n'est nin qwate.

VICTOR - Mins mi, sés-se, ci c'èsteût si mava qu'çoula, dj'ènnè prindreû qu'treûs come li docteûr l'a dit.

MATIEU - C'est qu'dji so-st-on pô pus nièrveûs qu'd'abitude oûy.

VICTOR - Po quéle raison ?

MATIEU - Po rin, pace qui dj'so chal è m'fauteûy.

VICTOR - Dji t'comprind, ci n'deût nin èsse plaîhant por twè qu'aveûs todi 'ne saqwè à fé qwand Mèliye èsteût-st-è fauteûy come ti ès-st-asteûre.

MATIEU - Ti l'as dit, dji n'aveû mây ine munute d'à meune, c'èsteût li d'djuner, fé les léts, li manèdje, aîdî Mèlîye à d'hinde les montêyes, fé les hièles, les comissions, li dîner, wèster l'tave, rimète li tave, è l'riwèster, fé l'cafè... Ni m'ènnè djase nin, va !

VICTOR - C'est bin vrêye, dji n'areû nin volou èsse è t'plèce, mins asteûre qui t'n'as pus rin à fé, ti t'plaîs må.

MATIEU - Ba ! nin trop'... (il èsprind tot l'minme si cigare divant dè porsûre)... dji m'laîs viker èt nos veûrans pus tard qwand dj'porè roter.

(on sone)

VICTOR (<u>i s'drèsse</u>) - Ci deût èsse Ortense.

(tot d'hant couls, i va d'vès l'pwète èt sôrtèye tot fant qu'Mèlîye vint foû dè l'couhène)

SCIN.NE 17 : Matieû - Mèlîye

MELIYE - I m'sonle qui dj'a-st-oyou soné, èdon ?

MATIEU - Awè, ci deut èsse Ortense, Victor è-st-èvôye droviért.

(come i dit coula, Ortense inteûre avou Victôr. Ele pwète on filèt qu'èle mète so l'tave èt va d'vès Mèlîye)

SCIN.NE 18 : Matieû - Mèlîye - Ortense - Victôr

ORTENSE (èle rabrèsse Mèlîye) - Bondjou, soûr.

MELIYE (qwand èlle a rabrèssi Ortense) - Qué novèle, don, vos, wice avez-ve situ?

ORTENSE - Dj'a profité qu'nos v'vinîz vèyî po-z-aler atch'ter quéquès saqwès qu'dj'a mètou è cofe dè l'vwètûre.

MELIYE (èle mosteure li filèt) - Et çoula ?

ORTENSE - C'est po Matieû et por vos... (ele va d'vès Matieû)... Oh ! pardon, savez, Matieû, dji roûvèye di v'rabressî, mi.

MATIEU (adon qu'Ortense èl rabrèsse) - Ci n'est rin, Ortense, mins qu'i-n-a-t-i è vosse filèt ?

ORTENSE - Nin grand-tchwè.

MELIYE - Qwè ?

ORTENSE - Dè boûre qui dj'fais mi-minme, deûs polèts, ine robète èt des oûs d'nos poyes qui dj'a rascoyou a matin.

MELIYE - I n'faléve nin, èdon, soûr, mins assiyez-ve, ni d'morez nin so vos djambes. Volez-ve ine jate di cafè?

ORTENSE - Dji vou bin.

MELIYE (tot prindant l'filèt) - Dji va mète çoula è frigo èt dji v's apwète vosse cafè. Et mèrci po l'boûre èt tot l'rèsse.

ORTENSE - Ci n'est rin, èdon.

(Mèlîye rimousse è l'couhène)

SCIN.NE 19 : Matieû - Ortense - Victôr

ORTENSE - Et vos, Matieû, ça va ?

MATIEU - Come vos vèyez, ine djambe so l'tchèyîre. A part çoula, tot va bin.

VICTOR - Tot çou qu'i deût fé, c'est prinde po les niérs, volà s'botèye.

ORTENSE - Vos f'rîz bin d'ènnè prinde ossu, vos, po vos niérs.

(come èle dit coula, Mèlîye a-st-intré èt l'a-st-oyou)

SCIN.NE 20 ; Matieû - Ortense - Victor - Mèlîye

MELIYE - Poquè, soûr, Victôr est niérveûs ?

ORTENSE - Dj'èl vou bin creûre, i n'tint pus è plèce qwand 'ne saqwè n'va nin.

MELIYE - Si vos volez, qwand l'docteûr vinrè, dji lî d'mandrè dè fé 'ne ôrdonance po qu'vos polez' avu l'minme botèye qui Matieû. Qu'ènnè d'hez-ve, Victôr ?

VICTOR - Bin, c'est qui...

MATIEU - Ni t'ènnè fais nin, dji m'arindj'rè avou l'docteur.

ORTENSE - N'èl roûvîz nin ?

MATIEU - Si dj'èl roûvèye, Mèlîye m'èl rapèl'rè, pace qui lèye ni roûvèye mây di m'fé prinde mi botèye, vos m'polez creûre.

ORTENSE - Asteure, sour, dji v'dimande pardon, mins nos nos d'vans saver là qu'nos d'vans èsse à l'cinse po quand les èfants r'vinront èt dj'deus co fé l'amagni dismètant qu'Victor a co d'l'ovrèdje.

MELIYE - Bin v'l'arez faît coûte.

ORTENSE - Qui volez-ve, nos n'èstans nin rintîs, nos-autes... (èle va rabrèssi Mèlîye)... Mins nos r'vinrans l'pus vite possibe.

VICTOR - Et dj'enne profitre po t'fé m'prumî pay'mint, Matieû.

MATIEU - I n'a rin qui broûle, hein, Victôr.

VICTOR (tot serant l'main d'à Matieû) - Çou qu'est dit est dit, Matieû...
Mutwet disqu'à l'samin.ne.

ORTENSE (èle va rabrèssi Matieû) - i r'vèy, Matieû.

MATIEU - Awè, Ortense.

MELIYE (tot rindant l'filèt à Ortense) - Eco mèrci po les polèts èt tot l'rèsse, Ortense, dj'après'tèy'rè les polèts po djûdi là qu'c'est l'Asincion èt qu'Colète vint avou Roger èt les èfants po diner... (èle rabrèsse Victòr so l'tchife)... À r'vèy, Victòr.

VICTOR - A r'vèye, Mèlîye.

(Mèlîye va disqu'à l'pwète avou Ortense èt Victor èt là, èle s'arèstèye tot d'hant :

MELIYE - Vos f'rez bin, èdon, soûr ?

ORTENSE - Awè, Mèlîye, ni v'dèrindjîz nin.

MELIYE (tot fant qu'Ortense èt Victor sortèt) - Bon voyèdje, ainsi, èt s'fez bin atincion ava les vôyes, Victor, avou les accidints qu'on veut ouy.

(èle dimeure on moumint avou l'pwète droviowe èt adon èle rissére

cisse-chal èt va d'vès l'couhène tot d'hant :

MELIYE - Dji va fé m'dîner, asteure, Matieu. MATIEU (tot r'prindant s'gazète) - Awè, m'fèye.

(i resprind co s'cigare et drouve si gazete dismetant qui...

LI TEÛLE TOME

TREÛZINME AKE

Minme dècôr qu'à prumîr ake. Qwand l'teûle si lîve, li radiyo va èt Matieû, qui rote come d'avance pôr qu'i n'a mây rin avu, fait-st-aler l'aspirateûr, mins nin trop reût, po prinde les poûssîres. I s'arèstêye, sospîre èt va sètchî on côp à s'cigare qu'est so on "cendrier", come on dit è français, qu'est so li p'tite tave qu'est todi tot près dè fauteûy. Adon, i va r'prinde l'aspirateûr qwand on sone. Il arèstêye l'aspirateûr èt i va droviért po rintrer avou Victôr. Victôr a-st-on paquèt è s'main.

SCIN.NE 1 : Matieû - Victôr

MATIEU - Si dj'm'atindéve à t'vèyî, mi, qui vins-se fé à Lîdje oûy, don, Victôr?

VICTOR (tot mètant s'paquèt so l'tave) - Kimint çoula çou qu'dji vins fé à Lîdje ?

MATIEU - Bin awè.

VICTOR - N'estans-gne nin oûy li dièrin djoû dè meûs?

MATIEU - Siya, mins...

VICTOR - Et adon.

MATIEU - Adon qwè ?

VICTOR - N'est-ce nin l'djoû qu'dji vin fé m'pay'mint à t'notaîre.

MATIEU - Tins, c'est vrêye, dji n'î tûzéve minme pus.

VICTOR - Pace qui ti t'laîs viker, twè !

MATIEU (tot mostrant l'aspirateur) - Wêye, valèt, t'èl pous dire.

VICTOR - Kimint, c'est twè qui...

MATIEU - Qui prind les poûssîres, come t'èl pous vèyî.

VICTOR - Ci n'est nin vrêye!

MATIEU - Oh ! siya. c'est vrêye èt c'n'est nin tot.

VICTOR - Qui vous-se dire ?

MATIEU - Qui dispôy qui dj'so so pîd, il est d'vrêye qui t'n'as pus v'nou èt qu'ti n'è sés rin, dj'aîde Mèlîye à fé l'manèdje. Qui dis-dje qwand dji djåse di l'aîdî, c'est quasî mi qui fait tot tot seû.

VICTOR - Tot set!

MATIEU (i va arèster l'radiyo) - C'est come dji t'èl dis, valèt Victôr.

VICTOR - Et Mèlîye, lèye, qui fait-èle ?

MATIEU - Ele fait les léts l'a-matin, li dîner èt l'soper èt èco !

VICTOR - Eco qwè ?

MATIEU - À pus sovint, c'est co mi qui pèle les crompîres.

VICTOR - Et li d'djuner ?

MATIEU - C'est co mi qu'èl fait.

VICTOR - Kimint coula ?

MATIEU - Pace c'est mi qui m'lîve li prumî èt so l'timps qu'èle fait les léts, dji mète li tave, dji fais l'cafè, dji mète rosti l'pan pace qui dispôy qu'èlle s'a pinsé malade, èle ni magne pus qu'dè pan rosti.

VICTOR - Et adon ?

```
MATIEU - Adon dj'èl houke èt si èlle est prète, èle dishind po d'djuner. Et ç'n'est nin co tot.
```

VICTOR - Kimint, ti fais co aute tchwè?

MATIEU - Awè, Victor.

VICTOR - Qwè ?

MATIEU - Dji va co fé les comissions èt çou qu'i-n-a d'mîs, c'est mi qui va fé l'bouwêye à lavwér asteûre.

VICTOR - Li bouwêye !

MATIEU - Awè, mins coula c'n'est rin pace qui so l'timps qui l'machine toûne, dji va beûre mi vêre di bîre a cafè qu'è-st-à costé.

VICTOR - Mins c'n'est nin possibe!

MATIEU - Siya, Victor, ci n'est pus l'Mèlîye qui t'as k'nohou qwand t'as v'nou l'dièrin.ne fèy i-n-a on meûs s'dji n'mi marihe nin.

VICTOR - Elle a candjî à ç'pont-là, lèye qui d'avance èsteût si fîre dè fé s'manèdje !

MATIEU - Awè, valèt, èlle a candjî.

VICTOR - Mins poqwè ?

MATIEU - Si dj'el sepéve, dji t'el dîreû.

VICTOR - Et wice è-st-èle po l'moumint ?

MATIEU - Madame è-st-à l'owèfeûse

VICTOR - A l'cwèfeûse so l'timps qu'ti prinds les poûssîres.

MATIEU - C'è-st-ainsi.

VICTOR - Et t'belote ?

MATIEU - Mi belote, dj'èl ridjowe tos les sèm'dis pace qui dj'fais les comissions l'vinr'di après-l'dîner po l'sèm'di èt l'dîmègne.

VICTOR - Et ti t'lais fé!

MATIEU - Qui vous-se qui dji fêsse, qui dji m'ricasse li djambe tot r'toumant à l'valêye dè l'montêye ?

VICTOR - Ti pôreûs r'prinde ine chèrvante ?

MATIEU - Ine chèrvante! T'èl sés bin, on n'a-st-avou treûs, mins n'a nole qui s'a polou arindjî avou Mèlîye.

VICTOR - Et 'ne feume à l'djournêye ?

MATIEU - Ci sèreût parèy, i n'a nole qui sareût rin fé à s'manîre.

VICTOR - Et bin dji t'plains, valèt Matieû, pace qui ç'n'est nin 'ne vèye po in-ome, hein, çoula !

MATIEU - Dji n'dis nin, mins dji m'î faîs... (<u>i mosteûre li paquèt qu' Victôr aveût mètou so l'tave qwand il a-st-intré</u>)... Mins, dis, Victôr, qu'est-ce qui c'est qu'çoula èt ni m'dis nin qu'c'est co on paquèt d'à Ortense?

VICTOR - C'est portant çoula èt s'ti vous on consèy, vas-se lu mète è frigo pace qu'i-n-a dè boûre divins èt avou l'tcholeûr qu'i fait, i deût d'djà èsse mol.

MATIEU (<u>i prind l'paquèt èt l'aspirateur là qui l'prise di courant, come on dit è-st-è l'couhène</u>) - Dj'i va èt tant qu'dj'i so, dji va r'mète l'aspirateur è s'plèce.

VICTOR - Et tes poûssîres ?

MATIEU (tot sôrtant) - C'est bon ainsi po oûy, dji rataqu'rè d'main.

(Dimoré tot seû, Victôr èsprind s'pîpe èt Matieû rinteûre, si va
rassîr è s'fauteûy èt rèsprind s'cigare)

MATIEU - Volà, c'est fait, mins dis-me on pô, ti n'as nin v'nou disqui chal po m'apwèrter dè boûre èt 'ne robète?

po payî l'notaîre... Deûzin.m'mint po t'dîre bondjou èt po t'apwèrter l' paquet d'à Ortense et trefizin.m'mint... (i sorève sins fini cou qu'il aléve dire) MATIEU - Treuzin.n'mint ? VICTOR - Po v'ni quèri mes botèyes. MATIEU - Ti n'as nin mèzahe di m'èl dire, dji m'ènnè dotéve. VICTOR - T'èlz'a, dè mons ? MATIEU (i mosteure li p'tit meube) - Sur qui dj'èlz'a, ti n'as qu'a drovi l'arma, èle sont d'vins. (Victor si drèsse, va drovi l'arma et prind deus botèyes qu'i mète so l'meûbe à costé dè l'cisse d'à Matieû là qu'ci-chal prind todi l'sonk) VICTOR (i mète si main è l'potche d'a d'vins di s'pal'tot) - Et kibin t'deûs-dje ? MATIEU - T'es sot, twè ! VICTOR - Nèni mins c'est qui l'wiski, ci n'est nin po rin, pôr qu'il est MATIEU - Ni t'ènnè fais nin, c'è-st-on compte avou m'docteur. VICTOR (i mosteure li botève d'à Matieu) - Pace qui twè ossu, t'ènnè prinds MATIEU - Awè, hein, malureûs, pusqui c'est po mes niérs. Et twè ? VICTOR - Qwè mi ? MATIEU - Et Ortense ? VICTOR - Ortense ! MATIEU - Ele ni s'dote di rin po tes botèyes ? VICTOR - Di rin dè monde, èle dit minme à tot l'monde qui dj'n'a may situ si bin qui dispôy qui dj'prind l'botèye di t'docteûr, minme qui l'feume d'on vuèzin li a d'mandé s'èle ni sareut nin avu eune po si-ome. MATIEU - Hale dè pîd, hein, Victôr, mi camarade li docteûr Minèt fait çoula por mi èt por twè pace qui dj'lî a d'mandé èt qu't'es m'bê-fré, mins po des ètrindjîrs, c'est bonute ! VICTOR - Mins sim'v wezin m'el dimande lu-minme ? MATIEU - Dis-lî qu'i vinse trover m'docteûr, ci-chal lî donrè 'ne saqwè po les niérs, mins ci n'sèrè nin dè wiski, ti m'pous creûre. VICTOR - C'est bon, si m'èl dimande, dji li dirè... Aute tchwè, asteure. MATIEU - Qwè ? VICTOR - Kibin costeye-t-i t'wiski ? MATIEU - Dji t'as d'djà dit qu'c'èsteût on compte avou m'docteûr. VICTOR - Awè, mins c'è-st-Ortense qui m'a d'mandé k'bin qui l'botèye costéve. MATIEU - Ci n'est qu'coula, ti n'as qu'a li dire qui c'est t'mutuèle qui paye quasi tot et qu'ele ni t'costeye nin grand-tchwe. VICTOR - Et bin si c'è-st-ainsi... (i va qwèri eune di ses botèyes) MATIEU - Qui fais-se ? VICTOR - Nos alans beure on vere essonle tant qu'nos n'estans qu'nos deus. MATIEU (i s'drèsse) - C'è-st-ine bone îdèye... (i va d'vès l'couhène)... dji va qweri des veres... (i s'arestêye, si r'toûne dives Victor)... Qui vous-se è t'vêre, di l'êwe ou dè l'glèce ? VICTOR - Dè l'glèce. MATIEU (i mousse è l'couhène èt i r'vint avou deus vêres èt on bokèt d'glèce

VICTOR - Nèni, hein, Matieû. Prumîr'mint, come dji t'l'a dit, dj'a v'nou

divins chaskeune)... Volà les vêres... (come Victôr vout disboucher eune

```
di ses botèyes)... Et s'wade tes botèyes po qu'èle sèyèsse pleintes quand
  ti rinteur'rès.
       (çoula dit, i mète les vêres so l'tave, va quèri s'botèye èt chève
        deûs bons vêres. Adon, i prind l'sonk, si va rassîr è s'fauteûy)
MATIEU (tot lèvant s'vêre) - A l'santé d'nos niérs, Victôr.
VICTOR (i prind s'vêre) - Ni m'fais nin rîre, hein.
           (i buvèt on côp èt Victôr fait claper ses lèpes)
VICTOR - Il est qu'arèdje bon, sés-se !
MATIEU - Dis, i m'fat bin çoula po-z-avu l'moral po fé l'manèdje.
VICTOR - Mi ossu, po sognî mes bièsses.
    (à c'moumint-là, on sone)
MATIEU - Tins, ci n'est nin Mèliye portant, èlle a s'clé... (i s'drèsse)...
  Mins on n'aét may, ossu buvans nosse vêre, dj'èlzè va rèpwèrter è l'couhène
  èt t'îrès droviért.
        (i buvèt leû vêre, Matieû lzè prind èt mousse è l'couhène so l'timps
         qu'Victor ratind 'ne munute adon qu'on sone co èt adon i va drovi l'
         pwète dè colidor èt i rinteure avou Colète tot djusse come Matieu
         r'vint dè l'couhène)
                 SCIN.NE 2 : Matieu - Victor - Colète
COLETE - Bondjou, papa.
MATIEU (tot-z-alant rabrèssi s'fèye) - Bondjou, m'fèye, mins qui v'nez-ve
  fé chal oûy, vos ?
COLETE - Kimint, mi mame ni v's a rin dit ?
MATIEU - Vosse mame !
COLETE - Bin awè.
MATIEU - Nèni.
COLETE - Et wice è-st-èle ?
MATIEU - Elle è-st-èvôye à l'cwèfeûse come dji l'a dit tot-rade à vosse
  mon-onke Victôr.
COLETE - Et èle ni v's a nin dit qu'dji lî aveû tèlèfoné ?
MATIEU - Tèlèfoné !... Et qwand çoula ?
COLETE - Divant-z-îr après-l'dîner po lî dîre qui nos 'nn'alans dîmègne
  å matin èt qu'nos vinrîs soper oûy à l'nute avou l's èfants.
MATIEU - Et bin vo-'nnè-là eune di novèle !... Et wice alez-ve ?
COLETE - A l'mér po quinze djoûs.
MATIEU - Et poquè n'avez-ve tèlèfoné çoula qui d'vant-z-îr?
COLETE - Pace qui c'est d'vant-z-îr qu'on m'a tèlèfoné d'Ostende qui n's
  avis co dè l'plèce à l'ôtél là qu'nos alans d'abitude.
MATIEU - Et c'est po coula qu'Roger n'm'a rin dit sèm'di qwand n's avans
  stu djouwer 'ne belote, i n'est saveût co rin.
COLETE - Nèni.
MATIEU - Et v's alez-st-à Ostende ?
COLETE - Dji vins di v's èl dîre, mins dj'î tûze...
MATIEU - Qwè ?
COLETE - Poquè n'vinrîz-ve nin avou nos-autes ?
MATIEU - Mi dji n'dimand'reû nin mîs, m'fèye, mins èl fat d'mander à vosse
  mame!
COLETE - C'est bin vrêye, papa!
MATIEU - Oh ! awè !
COLETE - Vos sèriz si binahe qui coula ?
```

MATIEU - Nin binahe, dji sèreû-st-andjes.

```
COLETE - As andies ! ... Et poquè ?
MATIEU - Bin pace qui...
   (come i s'taît, Colète èl louke èt adon louke si mon-onke Victôr)
COLETE - Mins qu'i-n-a-t-i chal, papa ?
MATIEU - I-n-a... I-n-a...
   (come i n'a nin pus lon, c'est Victôr qui djase)
VICTOR - Pusqui vosse papa n'wèze rin dire à çou qu'dji veû, dji v's'èl
  va dire, mi, mi p'tite Colète... (tot d'hant coula, i mousse è l'couhène
  èt i r'vint avou l'aspirateur qu'i mète à l'tére)... I-n-a coula.
COLETE - L'aspirateur !
VICTOR - Awè, mi p'tite Colète, l'aspirateur !
COLETE - Mins qui vint-i fé là-d'vins ?
VICTOR - Lu, quast rin, mins i-n-a tot l'rèsse.
MATIEU - Victôr !
VICTOR - Twè, taîs'-tu, laîs-me djaser.
COLETE - Mins qu'est-ce qui coula vout dire ?
VICTOR - Coula vout dire qui vosse papa m'a raconté tot.
COLETE - Tot qwe ?
MATIEU - Victor, dji t'è prèye !
VICTOR - Twè, fome ti cigare... (à Colète)... Et bin volà, Colète, dispôy
  qui vosse papa est so pîd, c'est lu qui faît quasî tot l'manèdje chal
  come qwand vosse mame èsteût è s'fauteûy èt qu'èle dihéve qu'èle ni
  sèpéve pus rin fé.
COLETE - Li manèdje !
VICTOR - Awè, mi p'tite Colète... I fait...
MATIEU - Victôr !
VICTOR (i fait l'ci qui n'a nin oyou) - C'est lu qui fait l'cafè po d'djuner,
  qui mète li tave, qui rostihe li pan, qui prind les poussîres, li proûve ...
  (i mosteure l'aspirateur)... Vo-l-là, i s'ènnè chèrvéve qwand dj'a v'nou.
  Et c'n'est nin co tot, i fait les hièles, les comissions èt c'est co lu
  qui va fé l'bouwêye å lavwér èt dji n'sé pus tot qwè... (i sospire)... Et
  volà cou qui s'passe chal oûy come vos l'dimandîz, Colète... (i va d'vès
  l'pwète dè l'couhène)... Et asteure dji va beure ine saqwè, dj'ènn'a
  mèzahe !... (tot d'hant coula, i prind l'aspirateur èt il inteure è l'
  couhène.
                SCIN.NE 3 : Matieû - Colète
   (Colète va prinde si papa po l'hatrê)
COLETE - Papa.
MATIEU - Diqwè, m'fèye ?
COLETE - Est-ce vrêye çou qui m'mon-onke Victôr a dit ?
MATIEU - C'est qui...
COLETE - Est-ce vrêye, papa ?
MATIEU - Awè, m'fèye.
COLETE - Mins si c'est vos qui fait l'manèdje, mi mame qui faît-èle ?
MATIEU - Ele fait les léts, à dîner, à soper èt èle ristind l'bouwêye là
  qui l'manîre là qu'on l'faît a lavwér ni lî dût nin.
COLETE - Et poquè n'avez-ve may rin dit à Roger ?
MATIEU - Pace qui c'n'est nin 'ne saqwè qu'on dit.
COLETE - Et à docteur Minèt, enn'i avez-ve djasé à docteur Minèt ?
MATIEU - Awè.
COLETE - Et qu'a-t-i dit ?
```

MATIEU - Qu'areût-i polou dîre ?

COLETE - Il a tot l'minme dit 'ne saquè.

MATIEU - Neni, v'dis-dje, et vos n'dîrez rin nin pus.

COLETE - Oh! po çoula, papa, dji n'vis vou rin promète, mins come dji comprind qu'vos vôrîz bin prinde des vacances, po cèsses-chal, dji m'ènnè tchèdje èt v'polez-t-èsse sûr èt cèrtain qui m'mame dîrè-st-awè.

(so l'timps qu'èle dit coula, Victor a sortou de l'couhène et il a-st-oyou Colète)

SCIN.NE 4 : Matieû - Colète - Victôr

VICTOR - Bin djasé, mi p'tite Colète.

MATIEU - T'as mètou l'timps, twè, po beûre on vêre.

VICTOR - Dji t'a volou lèyî avou t'fèye èt èlle a raison, ti vas prinde des vacances. Et vous-se bin qu'dji t'dèye aute tchwè tant qu'nos n'èstans chal qu'avou t'fèye, mins ni t'måvèles nin?

MATIEU - Qwè ?

VICTOR - Ti n'es nin in-ome.

MATIEU - Kimint ?

VICTOR - Nèni, hein ! So l'timps qu'Mèlîye èsteût è s'fauteûy èt qu'èle s'apinséve malade, d'acwérd, t'as fait ti d'vwér tot fant l'manèdje, mins asteûre...

MATIEU - Qwè, asteure ?

VICTOR - Ti roûvèyes sûr'mint qu't'as-st-ovré vingt-cinq ans è ti-ouhène po poleûr viker rintî èt qui t'feume ni maquasse di rin èt asteûre, vo-l'la, louke, li rintî, i faît l'dômèstique.

COLETE - Haye ! djans, mon-onke, ni d'hez nin çoula ?

VICTOR - Mins dj'n'a tot l'minme nin twért, Colète!

COLETE - Nèni, mins vos fez dè l'pon.ne à m'papa èt dji n'vou nin. Si 'ne saquî deût djasé à m' mame, ci sèrè mi.

VICTOR - Adon n'ratindez wêre pace qui vosse papa prind d'djà po ses niérs, come mi, èt si çoula deûre co longtimps, ses niérs îront co pus må èt i n'fåt nin qu'çoula arive.

COLETE - Lèyîz-me fé, mon-onke, dji...

(èle ni finihe nin là qu'Mèliye inteure bin moussèye èt bin cwèfêye)

SCIN.NE 5 : Matieû - Colète - Victôr - Mèlîye

MELIYE (tot-z-intrant) - Tins, Victor, mins qui fez-ve chal?

VICTOR - Dj'a v'nou qwèri mes botèyes po les niérs, Mèlîye.

MELIYE (tot rabrèssant Colète) - Et vos, m'fèye ?

COLETE - Dj'a v'nou vèyî m'papa, mame, minme qu'il a stu tot èwaré d'aprinde qui n's alîs 'nn'aler dîmègne adon qu'dji v'l'aveû dit qwand dji v's a tèlèfoné.

MELIYE (à Matieû) - Oh ! mon diu, m'pauve tièsse, dj'a roûvî di v's èl dire, mi-ome !

MATIEU - I n'a rin d'ma fait pusqui dj'èl sé, èdon, Colète ?

COLETE - C'est vrêye, mame, èt m'papa sèreût minme binahe si vos v'nîz avou nos-autes.

MELIYE - Avou vos-autes !

COLETE - Poquè nin, coula f'reût mutwèt dè bin à m'papa po ses niérs.

MELIYE - Mutwèt bin.

VICTOR - Colète n'a nin twért, savez, Mèlîye, èt si dj'èsteû vos, dj'îreû.

MELIYE - Qu'ènnè pinsez-ve, vos, Matieû ?

```
MATIEU - Bin, dji n'dîs nin nèni, mins po l'soper d'oûy ?
MELTYE - Li soper d'oûy, dji l'aveû co roûvî !
MATJEU - Et qu'alans-gne fé ?
MELIYE - Nos f'rans l'soper, come di djusse, mins...
MATIEU - Mins què ?
MELIYE - I fare, bin qu'vos alez' fé les comissions.
MATIEU - Dji vou bin si Victôr vint-st-avou mi.
VICTOR - Mi !
MATIEU - Poquè nin, nos îrans beûre on vêre à cafè des Brèsseûs, dj'atch'tèy'rè çou qu'i fât èt ti m'ramonrès.
VICTOR - Ci ç'n'est qu'çoula.
MATIEU (à Colète) - Mins qui volez-ve po soper, m'fèye ?
COLETE - Vos k'nohez Roger, papa, on bon biftèk, des fritches èt
  dè l'salade, c'est çou qu'il inme li mîs.
MATIEU - Adon, qui vas-se po on biftèk.
MELIYE - Mins loukîz qu'i seûye bin tinre, èdon.
MATIEU - N'ayîz' nole sogne, dispôy qui dji fais les comissions,
  dji m'î k'nohe.
VICTOR - Dji sc d'acwérd, mins d'vant çoula.
MELIYE - Qwè d'vans çoula, Victôr ?
VICTOR - Dji vôreû bin beûre on p'tit vêre po mas niérs, pace qui
  rôler è l'vèye, çoula m'ènèrvêye.
MELIYE - Si vos volez, Victôr... (à Matieû)... Dinez on pô on vêre
  à Victôr.
MATIEU (<u>tot pri</u>ndant s'botèye) - Et mi ?
MELIYE - Buvez onk avou Victor si vos volez, mins v'n'arez nouk
MATIEU - Nèni, m'fèye, dji va quèri des vêres.
           (tot d'hant çoula, i mousse è l'couhène)
               SCIN.NE 5 : Colète - Victôr - Mèlîye
™ELIYE - Et Ortense, Victôr ?
VICTOR - Ele va bin'èt èle vis a-st-avoyî dè boûre èt 'ne robète. MELIYE - Mins èle ni deût nin fé çoula, dji lî a d'djà dit.
VICTOR - Mins vos k'nohez Ortense, èle inme bin di v'diner 'ne
  saquè d'nosse cinse là qu'èle dit tofér qu'on n'sét pus çou qu'an
  mache oûy.
MELIŸE - Mos l'rabrès'rez èt.v'lî dîrez mèrci por mi, ainsi. (Matieû rinteûre avou deûs vêres èt de l'glèce divins)
               SCIN.NE 7 : Colète - Victôr - Mèlîye - Matieû
MATIEU - Et volà les vêres !
MELIYE - Adon vos n'avez qu'à v'chèrvi.
MATIEU (<u>i va měte les vêres so li p'tit meûbe</u>) - C'est çou qu'dji
  va fé.
      (<u>i prind li p'tit vêre qui chève di mèseûre, disbouche si</u>
      botèye èt chève li wiski qu'è-st-è l'botèye qui l'doctsûr
      lî done totes les samin.nes)
MATIEU (<u>i done on vêre à Victôr</u>) - Dji n'ti dis nin à t'santé avou
  'ne saquè qui vint dè farmacyin, hein, Victôr.
```

```
VICTOR - Nèni, Matieû, mins qwand fât bin, i fât bin, hein.

(i buvèt leû vêre, èlzè r'mètèt so l'tâve tot fant qu'Mèlîye
  MELIYE - Asteûre, dishambrez-ve àt n'riv'nez nin trop tard, savez,
  MATIEU - Dii n'a wade.
 MELIYE - Et s'loukîz qui l'biftèk seûye bin tinre, èdon,
 MATIEU - Dji d'mandrè qu'on m'mète li pus tinre possibe, mins dji
    n'so nin è l'tchar, mi, Mèlîye.
 MELIYE - Awè, c'est bon, corez' èvôye.
MATIEU (<u>i va rabrèssî Colète</u>) - Disqu'à l'nute, mi fèye, pace qui vos
    n'sèrez mutwèt pus chal qwand dji r'vinrè.
 COLETE - Awè, papa, disqu'à l'nute... (èle va d'vès Victôr, lî done ine bahe so l'tchife)... À r'vèy, mon-onke Victôr èt d'hez bondjoû
    à m'matante por mi.
 VICTOR - Et po vos-autes, bonès vacances, mi p'tite Colète.
 COLETE (come Matieû droûve li pwète èt sôrtèye tot fant qu'Victôr
    <u>èl sût) – Mèrci, mon-onke.</u>
            (Matieû ét Victôr sôrtèt tot fant qu'Mèlîye èt Colète si
             r'loukèt)
                     SCIN.NE 8 : Colète - Mèlîye
 MELIYE - Qu'avez-ve, don, m'fèye, poquè m'loukîz-ve ainsi ? COLETE - Pace qui dj'a-st-ine saquè à v'dire, mame.
 MELIYE - Ine saquè à m'dire, èt què ?
COLETE - À d'faît' di l'aspirateûr.
 MELIYE – Di l'aspirateûr !
 COLETE - Awè, mama.
MELIYE - Qui vint-i fé là-d'vins çi-là ?... Ah ! dji comprind, c'est
   vossa papa qui v's a dit qui...
COLETE - Nèni, ç'n'est nin m'papa.
MELIYE - Quî est-ce adon ?
COLETE - C'est m'mon-onke Victôr.
MELIYE - Kimint, vosse mon-onke Victôr ?
COLETE - Bin quand dj'a v'nou, il a stu qwèri l'aspirateûr è l'
   couhène èt i m'a raconté qui m'papa lî aveût dit qu'c'èsteût lu
   qui féve li manèdje dispôy qu'il èsteût so pîd.
MELIYE - Et après, çoula lî faît dè bin.
COLETE - Dè bin !
MELIYE - C'est dôminé pusqui quand l'èsteût è s'fauteûy avou s'
   djambe cassêye, li docteûr lî a d'vou d'ner po ses niérs là qu'i
  n'aveût rin à fé èt lî a minme dit dè beûre dè l'bîre po l'fé pihî. Tot fant qu'asteûre, il a 'ne saquè à fé èt i n's'anêye
  pus èt quand i va fé les comissions èt r'djouwer s'belote, i pout
  r'beûre ses vêres di bîre.
COLETE - Mins, mame, ci n'est nin à m'papa dè prinde les poûsgîres
  èt dè fé l'manèdje, çoula c'èsteût bon quand v's èstîz malade,
  mins asteûre.
MELIYE - Què asteûre ?
COLETE - Qui fez-ve, vos ?
MELIYE - Mi dji fais l'dîner, li soper èt dj'ristind l'bouwêye.
```

```
COLETE - Et c'est tot ?
MELIYE - C'est bin assez, m'fèya, èt çoula fait dè bin à vosse
  papa, dj'ènnè so sûre.
CCLETE - Dj'enne so nin si sûre qui vos, mame, pace qui quand dj'
  l'a-st-oyou tot-rade.
MELIYE - Poquè, i s'a plaindou ?
COLETE - I m'a-st-avizé candjî.
MELIYE - Candjî !
COLETE - Awè, mame.
MELIYE - Qui volez-ve dîre ?
COLETE - C'est qu'i n'rèye pus adon qu'i riyéve tofér quand dji
  v'néve èt minme qwand il aveût s'djambe so l'tchèyîre.
MELIYE - S'i n'rèye pus, il a ri assez dismètant qu'c'èsteût mi
  qui féve li manèdje.
COLETE - Mins d'vant qu'i n'vindasse si-ouhène, il î èsteût dispôy
  à matin disqu'à l'nute.
MELIYE - Tot fant qu'mi dj'èsteû, chal.
COLETE - Mins dji v's a d'djà dit dè prinde ine chèrvante dè timps
  qu'vos èstîz malade.
MELIYE - Et dji v's a rèspondou qu'dji n'voléve pèrsone è m'mohone.
Et à réze, mi fèye, dji v'l'a dit ossu, dji n'm'a may mèlé d'vosse
  manèdje, ossu ni v'mèlez nin dè l'meune, dji m'arindje fwért
  bin avou vosse papa èt s'tûzans pus vite à soper d'oûy à l'nute.
  A quéle eûre vinrez-ve ?
COLETE - Sèpt eûres, sèpt eûres èt d'mèye.
MELIYE - A sohaîtî qu'vosse papa seûye riv'nou à timps avou l'
tchar, pôr qu'il è-st-èvôye a Cafè des Brèsseûs èt qu'i tom'rè
  sûr so ses camarades.
COLETE - Si nos d'vans minme ratinde ine dimèye sûre divant dè
  magnî, ci n'est rin, dj'apwètrè 'ne botèye po beûre on vêre
  inte di nos-autes pace qui Roger inme co bin.
MELIYE - Dji voubin, mins min 'ne saqwè d'trop fwért, èdon, po vosse
  papa, i prind d'djà po ses niérs èt çoula n'lî vât rin dè beûre
avou çou qui l'docteûr lî fait prinde.
COLETE - Nèni, mame, on p'tit portô... (èle rabrèsse Mèlîye)...
  Et asteûre, dji m'ènnè r'va pace qui Roger s'va d'mander wice
  qui dj'so.
MELIYE (tot rabr<u>èssant Colète lèye ossu</u>) - Awè, m'fèye, disqu'à
  tot-rade... (come èle dit çoula, on sone)... Tins, c'est d'djà
  sûr vosse papa.
COLETE (tot-z-alant vès l'pwète) - Dimorez, mame, dji lî va drovi...
  (èle s'arèstèye so l'soû)... Mins atincion, èdon, mame.
MELIYE - Atincion à què ?
COLETE - Tot-rade po les vacances, vos dîrez-st-awè.
MELIYE - Awè, mins c'est por vos èt po l's èfants, savez.
COLETE (tot sôrtant) - Mèrci, mame.
          (èle sôrtèye tot fant qu'Mèlîye fait hossî s'tièsse èt
           Victôr inteûre avou on p'tit sètchêt d'plastic)
                 SCIN.NE 9 : Mèlîye - Victôr
```

MELIYE - Ah ! Vo-v'là, vos, Victôr ! VICTOR (<u>tot lèvant li sètchêt d'plastic</u>) - Awè, Mèlîye, dj'apwète

li tchar. MELIYE - Mètez-le so l'tave, Victôr... (come Victôr mète li tchar so l'tave)... Et Matieû, poqwè n'è-st-i nin avou vos ? VICTOR - Il a toumé so des camarades a Cafè des Brèsseûs èt i m'a d'mandé dè rapwèrter l'tchar là qu'i beût on vêre avou zèls. MELIYE - Qués camarades ? VICTOR - Li docteûr Minèt èt des autes qui dji n'kinohe, mi, Marcèl, Maurice èt dji n'sé pus quî. MELIYE - Dj'èlzè k'nohe, mi, mins vos. VICTOR - Què, mi ? MELIYE - Qui v's a-t-i pris dè raconter à m'fèye qui c'èsteût lu qui féve li manèdje chal ? VICTOR - Bin... bin... MELIYE - Bin què ? VICTOR - C'est lu qui m'l'a dit. MELIYE - Et poquè ? VICTOR - Pace qui quand dj'a v'nou, i prindéve les poûssîres avou l'aspirateûr. MELIYE - Et qu'avez-ve à vèyî là-d'vins, vos ? VICTOR - Mi rin, mins quand dj'a vèyou si-air èt quand dj'l'a-stoyou, dji... MELIYE (<u>èle li côpe</u>) - Vos n'avez sèpou t'ni vosse linwe qwand Colète a v'nou ? VICTOR - Nèni. MELIYE - Et bin ine aute fèy, vos aprindrez à hagnî d'sus, so vosse linwe. Et asteûre, mèrci po l'tchar. VICTOR - Vos n'm'ènnè volez nin trop', Mèlîye ? MELIYE - Ni djäsans pus d'çoula èt s'rabrèssîz m'soûr por mi tot lî d'hant qu'nos alans-st-aler à l'mér avou Colète èt les èfants. VICTOR (<u>i va d'vès l'pwète</u>) - Dji n'î maqu'rè nin... À r'vèy, Mèlîye, èt s'plaîhîz-ve bin à l'mér. MELIYE - Awè, a r'vèy. (Victôr sôrtèye èt Mèlîye va discrotchî l'tèlèfone èt fait on numèrô)

SCIN.NE 10 : Mèlîye

MELIYE (après aveûr ratindou on p'tit moumint & tèlèfone) - Alô !...

Li Cafè des Brèsseûs ?... Moncheû Legrand è-st-i todi là ?...

Ah ! il est co là !... El volez-ve bin houkî, s'i-v'plaît... C'est

Madame Legrand chal... Awè, dji ratind... (on moumint s'passe là

qu'Mèlîye danse sc on pîd ador so l'aute)... Alô !... Ah ! c'est

vos !... Et qué novèle, vos n'rintrez nin ?... Dji n'a d'keûre

di vos camarades, dji n'veûs qu'ine sôre, c'est qu'les èfants

v'nèt oûy à l'nute po soper... Kimint vos sèrez riv'nou, bin i

n'mâqu'reût pus qu'çoula !... Awè, c'est d'djà bon, mins dispêtchî:

ve, èdon... Awè.

(<u>èle racrotche èt fait in-aute numèrô</u>)

MELIYE (après on p'tit moumint) - Alô ! C'est vos, m'fèye ?... Çou qu'i-n-a !... I-n-a qu'vosse mon-onke Victôr a rapwèrté l'tchâr, mins qu'vosse papa n'est nin co rintré... Wice qu'il est !... À Cafè des Brèsseûs là qu'i pign'têye sûr avou l'docteûr, li bê Marcèl èt dji n'sé tot quî !... Dj'èl sé bin, m'fèye, mins po

ses niérs, i n'deût nin beûre !... Kimint, ci n'est qu'ine fèy à fé èt bin c'est co d'trop'... Awè, c'est bon, dji n'dîrè rin, mins Roger, wice è-st-i ?... Vosse papa lî a tèlèfoné d'l'aler r'trover !... Et il î è-st-èvĉye adon qu'i sét qu'vos d'vez v'ni soper oûy à l'nute avou l's èfants !... Mins vosse mon-onke Victôr ni m'l'a nin dit !... Ah ! c'est qu'i n'èsteût nin co là quand vosse mon-onke a quité l'cafè... Adon, m'fèye, fez-me on plaîsîr ?. Tèlèfonez à Cafè des Brèsseûs èt s'dimandez à Roger dè raminer vosse papa l'pus vite possibe pace qui dji k'nohe ses camarâdes, ine toûrnêye ni ratind nin l'aute èt come vosse papa n'a pus l'àbitude dispôy qui dj'a stu malâde, dj'a bin sogne qu'i n' rinteûre pètoye èt qu'nosse soper n'seûye so flote... Awè, m'fèye, mèrci... (èle racrotche li côrnèt, prind l'tchâr èt rinteûre è l'couhène tot d'hant :)... Rawardez qu'vos riv'nez', Moncheû Legrand !

(on moumint s'passe, nin trop long, èt l'tèlèfone sone treûs qwate fèy divant qu'Mèlîye ni vinse foû dè l'couhène. Elle a mètou s'vantrin èt èle va discrotchî l'tèlèfone)

MELIYE (a tèlèfone) - Alô !... Oh ! c'est vos, m'fèye Colète !...

Et adon ?... Ah ! vos avez tèlèfoné a Cafè des Brèsseûs èt v's avez djasé avou Roger ?... Kimint nèni ?... Pace qui vosse papa a d'djà qwité i-n-a-st-on p'tit moumint... Après m'côp d'tèlèfone.. Et k'mint a-t-i 'nn'alé ?... Kimint vos n'è sèpez rin, vos sèpez tot l'minme avou quî ?... Avou ses camarades... Et Roger ?... I n'èsteût pus là nin pus... Awè, m'fèye... Nèni, s'i-n-a 'ne saqwè, dji v'ritèlèfon'rè... Disqu'à tot-rade, dè mons dj'èl schaîte, mi tchâr est d'djà so l'feû po qu'èle cûse tot doûç'mint... (à ç'moumint-là, on sone à l'ouh d'intrêye)... On sone, mi fèye, c'est sûr vossa papa... Nèni, ni ratindez nin a tèlèfone, s'i-n-a 'ne saqwè qui n'va nin, dji v'rihouk'rè... Awè, m'fèye... (on r'sone co, Mèlîye va d'vès l'pwète qui mon.ne èt colidôr èt sôrtèye tot brèyant)... Munute, vo-m'chal !

SCIN.NE 11 : Mèlîye - Matieû - Li docteûr Minèt - Roger (Mèlîye rinteûre li prumîre tot fant qui l'docteûr èt Roger èl sûvèt tot t'nant chaskeun' Matieû po on brès')

MELIYE - Et bin, vos èstez gây, vos !

MATIEU (tot bouhant avou s'deûgt so si stoumak) - Mi, mins dj'n'a
bu qu'quéques vêres, n'est-ce nin vrêye, Roger ?

ROGER - Dji n'è sé rin, mi, dji n'vis a stu r'trover qui qwand
Colète mi l'a d'mandé là qu'vcs lî avîz tèlèfoné, mame.

MELIYE - Mins vos, docteûr, vos î èstîz !

LI DOCTEUR (tot-z-aîdant Matieû à s'assîr è fauteûy) - Mande èscusse,
Madame Legrand, mins mi nin pus, dji n'èsteû nin avou lu.

MELIYE - Kimint v'n'èstîz nin avou lu, mins m'bê-fré m'a dit qu'i
v's aveût vèyou èt qu'vos avîz bu on vêre èssonle.

LI DOCTEUR - On vêra, awè, èdon, Moncheû Pîre ? (i djase à Roger)...

mins dji n'a-st-arivé qu'après mes visites.

MELIYE - Avou quî èsteût-i d'abôrd ?

LI DOCTEUR - Avou Marcèl, Maurice, Françwès, Djôsèf Mâlèrbe qui vos
k'nohez bin èt Jules Dèlcoûr.

MATIEU - Çou qu'Houbêrt dit est djusse come ins djusse èt rond come

```
on posson, il a-st-arivé après mi èt nos n'avans bu qu'on vêra,
  hein, Houbêrt. Adon Roger a v'nou èt come on n'rote nin so 'ne
  djambe, dj'a r'payî 'ne toûrnêye èt çoula, djusse divant qu'vos
  n'tèlèfonahîze èt quand dj'a riv'nou dè tèlèfone, c'est zèls
  qui m'ont dit qu'i m'alîz raminer.
MELIYE - Il èsteût timps, sô come vos èstez !
MATIEU - Mi, sô !... Est-ce vrêye, Roger ?
ROGER - Bin, tot 1'minme.
MATIEU - Et twè, Houbêrt, qui dis-se ?
LI DOCTEUR - Ti feume n'a nin twért, Matieû.
MATIEU - Siya, èlle a twért !
MELIYE - Kimint don çoula ?
MATIEU - Pace qui dji n'so nin sô, mins dj'ènn'a m'sô!
MELIYE - Vosse sô d'què, don, vos ?
MATIEU - Mi sô dè fé l'manèdje asteûre qui v'n'èstez pus malade èt
  qu'vos n'l'avez may situ là qu'vos n'estîz qu'ine malade imagi-
  naîre come l'a scrît dji n'sé pus quî. Ossu, fifi... nini... fini,
  dji n'prindrè pus les poûssîres, dji n'f'rè pus les hièles ni
l'cafè l'a-matin. Et dis-m:'èl, Houbêrt, èl f'reûs-se, twè ?
LI DOCTEUR - Dji n'a rin à vèyî là-d'vins, mi, Matieû.
MATIEU - Et vos, m'fi Roger, èl f'rîz-ve, vos ?
ROGER - C'est qui...
   (come i s'taît Matieû fait-st-aler s'deûqt)
MATIEU - Vos avez raîson, ni d'hez rin, pôr qui n's alans-st-aler
  à l'mér èssonle... (<u>à Mèlîye</u>)... Mins vos !
MELIYE - Qwè mi ?
MATIEU - Qwand n'sèrans riv'nou dè l'mér, dji f'rè co les comissions,
  mins rin d'aute... Et asteûre.
MELIYE - Què asteûre ?
MATIEU (<u>tot s'drèssant come i pout</u>) - Dji m'va-st-aler mète mi tièsse
  dizos l'rôbinèt d'frcûde êwe èt vos m'f'rez deûs-treûs jates di
  neûr cafè po qwand dji d'hindrè pace qui dj'vou soper oûy avou
  mes p'tits-èfants.
    (i fait-st-on pas èt Mèlîye louke Roger)
MELIYE - Aîdîz-le à monter, m'fi Roger, çoula vat mîs qu'i n'tome
  come l'aute côp.
ROGER (i prind l'brès' d'à Matieû) - Alèz, vinez, papa, nos mont'rans
  nos d<mark>eûs.</mark>
LI DOCTEUR - Haye, djans, Matieû, ni roûvèye nin qu'ti t'as d'djà
  cassé 'ne djambe.
MATIEU - Mi qui m'a cassé 'ne djambe, c'est twè qu'l'as dit, mins
  oûy, çoula n'ariv'rè nin là qu'dji deût-st-aler à l'mér po prinde
  des vacances... (i va d'vès l'pwète qui mon.ne as tchambes)...
  I èstans-gne, Roger ?
ROGER (i prind Matieû po l'brès') - Awè, papa, vinez.
        (èt i sôrtèt tos les deûs)
              SCIN.NE 12 - Mèlîye - Li docteûr
MELIYE (quand Roger a sèré l'pwète po-drî lu) - Ine munute, Docteûr.
LI DOCTEUR - Fez, Madame Legrand.
       (Mèlîye mousse è l'couhène èt r'vint quasî ossi vite)
MELIYE - Volà, c'est fait, dj'a mètou l'êwe èt dj'a fait roter l'
```

```
machine si bin qui qwand mi-ome rid'hindrè, il arè ses deûs-treûs
   jates di cra cafè.
LI DCCTEUR - Vos. avez bin fait, Madame Legrand, dj'a les pinses qui çoula lî f'rè bin.
MELIYE - Mins quéle îdèye lî a-t-i pris di s'fé sô, parèt ?
LI DOCTEUR - Qui volez-ve, l'ocasion !
MELIYE - Awè, mins i sét tot l'minme qui m'fèye, si-ome èt les èfants
   d'vèt v'ni soper oûy avou nos-autes.
LI DOCTEUR - Qwand i vinront, i sèrè d'djà quasî r'mètou.
MELIYE - Qui l'bon Diu v's ôse, mins çou qu'i-n-a d'sûr, c'est qu'i
   n'bsûrè nin on vêre di vin.
LI DOCTEUR - Po çoula, vos årez raîson èt...
     (<u>i s'taît come</u> Roger rinteûre)
               SCIN.NE 13 : Mèlîye - Li docteûr - Roger.
MELIYE (ossi vita) - Et bin, Roger, kimint va-t-i ?
ROGER - On pô mîs qu'tot-rade.
MELIYE - Qu'a-t-i fait ?
ROGER - I s'a dismoussî come il a polou èt sins minme voleûr qui dj'lî d'nasse on côp d'main, saf po distèler ses solés.
LI DOCTEUR (tot soriyant) - Et adon, Moncheû Pîre ?.
ROGER - Il a mètou s'tièsse dizos l'rôbinèt èt il a fait cori de l'
   freûde êwe dissus come i l'aveût dit.
MELIYE - Et asteûre ?
ROGER - Il è-st-on pô dis'sôlé, i s'rimousse èt i va rid'hinde, mins
   dji n'sèrè pus chal.
MELIYE - Poquè ?
ROGER - Pace qui quand Colète m'a d'mandé d'el raminer, ele m'a ossu
   d'mandé d'atch'ter quéquès saquès po l's èfants.
MELIYE - Qwà ?
ROGER - Ine valise po-z-ataquer. MELIYE - Et après ?
ROGER - Quéquès mousseûres là qu'i crèhèt èt qu'les cisses di l'
   an.nêye passêye şont-st-on pô djusses.
MELIYE - Adon, rauardez 'ne munute.
     (tot d'hant çoula, Mèlîye va-st-è colidôr èt r'vint ossi
      vits avou s'sacoche. Ele droûve cisse-chal èt sètche quéques bilèts foù qu'èle sitind à Roger)
MELIYE - Tànàz, Roger, atch'taz-lzî ossu 'ne saqwè por mi.
ROGER - Mins...
MELIYE - I n'a nin des "mins", dji so tot l'minme leû grand-mére.
  Prindez-lzè, v'dis-dje.
ROGER (i prind les bilèts, rabrèssa Mèlîye so l'tchife) - Mèrci por zèls, mama, èt disqu'à tot-rada po sopar.
MELIYE - Awè, m'fi, si tot va bin.
ROGER (i donc li main a docteor) - A rivày Docteor
ROGER (<u>i done li main a docteûr</u>) - Ă r'vey, Docteûr.
LI DOCTEUR - A r'vèy, Moncheû Pîre, èt bonès vacances.
RCGER - Mèrci, DocteOr.
            (èt Roger sôrtèye adon Mèlîye va d'vès l'couhène
             tot d'hant :
```

SCIN.NE 13 : Mèlîye - li docteOr

```
MELIYE - Dji va qwèri l'cafè, docteûr, i deût èsse fait èt dj'va
    vůdî 'ne bone jate po qu'i n'seûye nin trop tchaud qwand mi-ome
    dishindrè... (<u>èle droûve li pwète dè l'couhène, si r'toûne divès l'dactoûr</u>)... Volez-ve eune ossu, docteûr ?
 LI DOCTEUR - Nèni, mèrci, Madame Legrand, mins disqu'à soper, sayîz
    d'ènne fé beûre quáques jates à voste ome.
 MELIYE - Sèyîz' sins pon.ne, èlzè baûrè èt dj'î va pace qu'i m'sonle
    qui dj'l'a d'hinde.
 LI DOCTEUR (come on ètind on brut d'vins les coulisses) - Mi ossu.

(Mèlîye inteûre è l'couhène èt à ç'moumint-là, on ôt on grand brut d'vins les coulisses tot fant qu'on ôt Matieû qui braît :
 LI VWES D'A MATIEU - Mèlîye !
     (adon on n'ètind pus rin tot fant qui l'docteûr coûrt drovi
      l'pwète èt braît lu ossu :
 LI DOCTEUR - Matieû !... (adon i va drovi l'pwète dè l'couhène èt
   braît co :)... Mèlîye, vinez bin vite !
             SCIN.NE 14 : Li docteûr - Mèlîye adon Matieû
 MELIYE (àle sôrtèye dè l'couhène avou l'caf'tiére di veûle è s'main)
   Qu'i-n-at-i, dj'a-st-oyou braîre Matieû èt vos ossu ?
 LI DOCTEUR (i rinteore divins les coulisses après aveor dit) - Dji
   n'à sé co rin, dji va vèyî.
(Mèlîye èl sût èt d'meûre so l'soû avou s'caf'tiére è s'main)
MELIYE - Mins qu'i-n-a-t-i ?
 LI DOCTEUR (i r'vint foû des coulisses) - Apwèrtez 'ne tchèyîre,
   Madame Legrand.
MELIYE - Ine tchèyîre, poquè fé ?
 LI DOCTEUR - Po-z-assîr voste ome.
MELIYE - Poqwè, il est co sô ?
LI DOCTEUR - Mutwet, mins...
MELIYE - Mins què, docteûr ?
LI DOCTEUR - I s'a cassé l'djambe, mins po l'bon ç'côp-chal.
MELIYE - Kimint po 1'bon ?
LI DOCTEUR - Dji m'comprind, Madame Legrand, dinez-me ine tchèyîre
   èt s'vinez avou mi.
       (il intrèt d'vins les coulisses èt i riv'nèt avou Matieû
       assiou so l'tchèyîre qui l'docteûr èt Mèlîye pwèrtèt tos
les deûs disqu'à fauteûy èt il assiyèt Matieû d'vins ci-chal
        tot fant qui l'docteûr dit :
LI DOCTEUR - Ni bodje nin t'djambe, hein, Matieû.
MATIEU - N'a nole avance di m'èl dire, dji n'sâreû.
LI DOCTEUR - Dinez-me co 'ne tchèyîre, Mèlîye.
      (Mèliye apwète ine tchèyîre, li docteûr èl mète divant l'aute èt tot doûc'mint, i mète li djambe d'à Matieû so
       les deûs tchèyîres, adon s'ridrèsse tot sospirant èt tot
       frotant s'front)
LI DOCTEUR - Ti n'as nin trop ma ?
MATTEU - Nin trop', mins tot l'minme.
LI DCCTEUR (i prind s'carnèt d'ôrdonances foû di s'potche, on bic, sicrèye deûs mots so 'ne ôrdonance èt èl done à Mèlîye) - Tènaz, Madame Legrand, alez' quèri çoula à farmacyin.
MELIYE (<u>èle prind l'ôrdonance</u>) - Tot dreût, docteûr.
```

(èt èle sôrtèye)

SCIN.NE 15 : Li docteûr - Matieû LI DOCTEUR - Et asteûre qui t'feume è-st-èvôye, est-ce dissôlé ? MATIEU - A mitan, là, poquè ? LI DOCTEUR - Pace qui dji t'va dîre ine saquè. MATIEU - Quà ? LI DOCTEUR - Ti vaûs t'djambe là, so les tchèyîres ? MATIEU - Bin sûr. LI DOCTEUR - Et bin ç'côp-chal, èlle est cassêye, mins ç'n'est pus 'ne blague, sés-se. MATIEU - Cassêye, t'ènn'ès sûr ? LI DOCTEUR - Awè èt mîs qu'çoula, dji t'va fé miner à l'ospità po qu'on t'èl rimète èt qu'on t'mète on plate. Et qwand l'plate sèrè deûr assez, ti r'vinrès chal avou des crosses po t'rassîr è t' fauteûy. MATIEU - D'acwérd èt vous-se qui dji t'dèye ine saqwè, mi ossu. LI DOCTEUR - Dis todi. MATIEU - Dji so binahe, Houbêrt. LI DOCTEUR - Binahe! MATIEU - Awà. LI DOCTEUR - Kimint çoula èt tès vacances ? MATIEU - Mes vacances, dj'èlzè pas'rè chal pace qui dj't'èl va dire, dji n'a may situ si pahûle qui quand dj'a d'moré chal, è m'fauteûy avou mes cigares èt les botèyes qui ti m'apwèrtéves...Vins chal. (li docteûr s'aprèpèya di Matieû) MATIEU - Bahe-tu ? LI DOCTEUR - Poquè ? MATIEU - Bahe-tu, t'dis-dje. (li docteur si bahe pus fwért, Matieû l'prind po l'hanète àt èl rabrèsse tot d'hant : MATIEU - Mèrci, Houbêrt, ti pous tèlèfoner po qu'on m'mon.ne à l'ospita asteure. (èt l'docteûr va discrotchî l'tèlèfone dismètant qui...

LI TEÛLE TOME